

敘州府志卷十一

壇廟二

富順縣

社稷壇 在西關外太平橋南

神祇壇 在北關外臨雒水

先農壇 在治東十里

厲壇 在北關外

文廟 詳學校

名宦祠

鄉賢祠

敘州府志

卷十一

壇廟

一

富順

忠義祠 在武廟後觀音閣左

節孝祠 在武廟後觀音閣右

關帝廟 治東北隅康熙五十七年知縣劉上駟修

劉上駟記後漢之興也創自艱危成於忠義當日

噓炎而峙之鼎者鞠躬盡瘁誓魚水之武鄉肘腋

扶持雄腹心之漢壽卽今載在永祀百世以之顧

何以祀武鄉者馨香盛在西南夷通我中原間有

巍祠未之能遍也惟祀漢壽者自王畿而郡縣都

邑下逮邨墟自九州而要荒聲靈遠屆外國無論

廟瞻肅穆抑且家繪鬚眉將與日月五星容光必

照將與風霜雷電觸物皆虔歷代崇加顯號極至
位之曰帝進而詣之曰聖曰神赫而歸其權曰伏
魔亦似其糾人心震聲靈居然出武鄉右者從讀
書日常洗心夙夜乃知異世之綸音追薦毋亦以
侯之浩然剛大懾服斯人因以么魔之叔世授戮
於侯也往如曹瞞鬼蜮在當時僅爲漢賊固千百
年奸雄之臭也侯當下邳擒時持秉燭之利刃而
魔伏當白馬斬將時魔報効之長戟而魔伏當函
書辭去時屈錕鍔之寶氣而魔伏正不俟威鎮樊
城徙都見避乃爲顯奪其魄也操且如此而謂邇

日之夔睢有不膽破其下而受之鈐者誰哉聞之
鑄鼎象物俾民知有神奸而已以今魍魎魑魅正
不在山澤山林

聖朝制典森羅視禹鼎更爲嚴重保能市門出入免不若
之逢乎以我夫子震懾其間必能誅心以劍佐司
寇之窮非復其他神道之設教比也舊廟一字今
現置河上東門建有年矣間歲大水汎濫滔滔波
濤直覆屋梁邑人操舟楫奉神尸以出逾時月復
奉以歸一似見逼陽侯孫而避之者駟歷官七年
每朔望瞻仰四壁猶有舊痕堂宇且漸就圯謀遂

舊貫而仍之竊慮江漲無時縱能更新終難免於水患爰三咨羣議邑父老進曰城東北有舊公廡隸名分司用以駐巡方使節毀久瓦磚間遺跡猶存盍遷諸旋往察其向背負山帶河正是中央高敞地東郭靈區也亟捐頒俸經之弗敢以違閱時爲門爲殿次第肇成環以墻垣守之扃鑰集邑士若民鐘鼓采仗舁侯向南面居焉自是蒸祭無在而無不在者也妥奉旣祝神且告邑人曰作善降祥不善降殃侯秉大義監視斯堂向惟舊宇水界下方屢遭汎濫浥柱浸梁神不安宅民胡以康乃

今改作移鎮中央明明在上赫赫在下於昭愾懋妥奉神將春秋享獻來集來翔人心淑慎王道光揚尙其虔惕仰答穹蒼魔惟侯伏魔伏心良是神是人永世其昌矣康熙五十七年十二月二十四落成是建也創也創難措辦不資募不資緩不役里民不妨農業不裁工值不亟馨鼓於神依之於心殫之神其鑒諸民且知之矣用告來者踵而恢廓之

文昌廟

明初在鍾秀山萬曆四十二年重修

國初移祀玉霄觀乾隆十四年移祀北街署令張鳳翥

置祭田十六畝四十一年署知縣段玉裁移建鍾秀山

明知縣徐騰芳記邑之中有崑橫枕西出岑立島峙有宮巋然湖水沄沄渟泓其下北則虎豹嶙峋而俯睇東南之山皆在其門戶窗牖之間者曰文昌帝君祠飛棟絕雲簷牙掛斗巖開菌桂蘊金碧之祥光礪吐天桃積神仙之粹氣予蒞茲土緬想帝君一十七世爲士大夫以忠孝特聞而靈尤顯於蜀不日不月照耀神州匪雷匪霆震疊萬古彼有蹙蹙爲仁跛跛爲義臚傳小儒之具緘滕大盜

之術者皆帝之所弗佑也其有蝨于庭蠹于里陽鱗于邦剪公兼弱豐屋蔀家者有不望帝座而歛焉黯焉顙赤而易慮焉者或寡矣夫昭明戒違彰往勗來是之謂名教名教之謂人綱人紀非帝君而易昭曷戒曷彰曷勗哉神力造乾坤之泰而廟貌同雲雷之屯予用愴焉爰鳩工庀材而子來同力不浹辰報就於是虹梁鴛瓦粉繪丹牖煥乎炳奕周匝垣宇眞丹臺碧洞上清靈圃也其勤積築督傭工與有勞者皆列名銜於碑之陰

國朝邑人李芝記治北鍾秀山秀甲諸峯山頂平曠

梓潼帝君舊有祠置自前明形家謂是山融結秀特靈脈所聚毓爲國華邑中由宋迄明名才科第^麟煽接踵爲神降所致蓋亦有所驗與夫幽明之理難臆測然古人審勢面吉以扶璿化豈偶然哉流賊遺氛所在琳宮俱遭燬燼祠亦倏成莽灌矣

國初祠於玉霄觀繼復建祠北街之陰規制亦稱然地卑址狹雜以民居非所以妥神靈崇祀典也承平百餘年搢紳耆老議欲規復舊址而恒以功鉅遂致中扼乾隆丙申邑令尹段侯臨蒞吾邑留心學校邑中有關風教者以次第舉詢諸紳士遂欲移

修帝君祠仍登山四顧見三巖蹇產峙於後兩湖混漾交映於前遙睇東南諸峯崎嶇獻狀雒水盤繞平沙漫流山動水搖遠近吞吐城肆煙嵐與林木光氣相接因喟然曰帝君常謂邛峽之靈應襟帶崖蠻愛而居之見諸紀載是山何減於紫府飛霞哉唯軍儲初備重用人勞乃咨黃髮眾議僉同士紳等咸樂飲助獲二千兩有奇諏吉葺事囑鄉士之老成歐陽治李則禹廖彩文朱振新等鬻材伐石構甃鳩工依舊址而恢濶之由山麓砌石爲級前爲門樓中正殿後寢室平以磚石繚之周垣

繪綵鏤刻堅緻閎麗工巨而人忘其勞成速而事皆有序肇工於乾隆四十一年七月中旬以是年冬月告竣納虛明之氣而挹仙子之居於是爲稱矣復將南極菴等處租穀共三十石入廟以爲祭費首事者願託貞珉以無忘賢侯之德而誌首事者之思芝維茲境高厰空秀帝君之靈應馨於此若賢侯之意吾儕當何以報之嘗讀化書謂取士非一端陰功孝行爲上卽云苦學酬勞高才遂志亦必根行與言合者然則士之上達亦返求諸學爾吾輩由階升堂當思學由漸進拜中堂思學進

高朗入寢室思學臻闢奧異日才名勛業必有追躡宋明者庶無負賢侯之意與當事之勞哉書法於常制外有衷於義合於時者得變例以示意芝非其人也因備述以誌日月云首事諸君同鄉樂助者例書碑陰

奎星閣

城隍廟 在北街康熙八年里人李學慧修乾隆二十五年知縣熊葵向重修撥中崖寺田上段入廟有記

邑人李學慧記吾邑自歷甲申難百里無煙城市

竟成邱墟慧自甲午正月從藺播山箐中歸來披荆芟草隨蛇蹤虎跡入時城中總計居民十三家雖居街市終日尙有不見面者如北門至水井街一帶久成虎穴寥寥居民無一人敢從此採樵卽本廟基址鞠爲茂草殿角廊廡亦難辨認慧率叔姪二人持强斧勁刀砍入始見金身於瓦礫榛莽中慧心惻然始募眾修理慧得入而焚獻荒城中仍聞鐘鼓聲越五年幸逢署任李侯恭裝神相修神龕鄉約王茂魁王愛臣裝彩左右判官三殿相繼重修迄今廟貌可觀凡蒞任縣主宿壇祈禱朔

望瞻拜始有舊制慧目念老矣恐早晚瞑目謹述始末俟後之鼎新者知縣熊葵向記城隍名見易泰卦古無其文唐始祀於吳越宋則各省皆祀陸稼書云春秋祀於壇朔望祀於廟京畿及郡州縣皆有神以主之與守土之官並職分權障衛黎庶典至重也癸酉冬余來富邑始謁廟見棟宇將頹臺階漸欹念城隍爲一邑主何堪頹廢至是思改作而力未能至戊寅調署彭山鬱鬱抱歉去己卯仍來富順道旁築室余懼蹈焉爰度地勢闢狹爲濶撤舊址而新之自屏牆至頭門儀門於正殿之

左右建立十殿殿前豎坊罩庭東西有樓更立後殿又撥東林寺趙家嘴富家壩三處田以作朔望焚獻之費躡斯廟者咸嘆布置攸宜矣但事無有成而不毀者廟成因書本末以俟後之蒞治斯邑者焉

離明祠 在治東北城隍祠後觀音閣內前祀火神左牛王右馬王後觀音像丁丑歲奉上憲頒文致祭薛翁祠 在西門外乾隆四十一年建

〔知縣段玉裁薛翁祠碑〕嗚呼古之君子惟其學之可傳其姓字可不傳也其居遊無定所也其託業

無定也玉裁於富順宋薛翁有感焉考宋史隱逸傳伊川程子語袁滋曰易學在蜀盍往求之滋游蜀無所遇久之遇賣醬薛翁於眉邛間與之語大有所得然不傳爲何語也繼續東萊呂氏撰薛常州誌有云袁道潔聞蜀隱君子名物色之莫能得末至一郡有賣香薛翁旦荷笈之市午輒扃戶默坐視之意象靜深道潔以弟子禮見且陳所學叟漠然久之乃曰經以載道子何博而寡要也與語未幾復去宋史云眉邛間呂氏云至一郡皆不定爲蜀之何郡縣最後讀浚儀王氏困學紀聞云譙

天授之易得於蜀夷族曩氏袁道潔之易得於富順監賣香薛翁故曰學無常師宋之富順監卽今富順縣也其爲富順縣人無疑詩曰高山仰止景行行止玉裁每求天下奇士於山林市肆而不一遇入蜀以來備員茲邑景慕薛翁之高風訪求懿跡莫有能舉其人者因設祠立位以祀之嗚呼薛翁邃於易學沈淪污賤其著書不傳也其行事不傳也其名與字不傳也其游無定所也其寄託無定業也惟其學之可傳若隱若見於百家雜記而感動興起於百世之下祠旣成玉裁敬□文刻諸

石系詩以告來者詞曰汶江陽陽洛水□□江洛之間先生賣香汶江如衿洛水如佩先生之靈此焉終晦空谷有蘭香不求聞深山有松歲寒益葺先民有言傳聞異辭清風作堂皮傅堪啜商瞿魯人而或以爲蜀賢惟桑與梓弗知恭敬焉堂階轍轡庶士攸跂江洛長流易學在是學政南滙吳省欽詩我登鉤深堂俯仰弔程叔傾懷治箴翁配祔欸改卜薛翁心迹同賣香給饘粥居鄰雒水濱行過眉山麓薄午扃兩扉意象肖枯木一語砭袁郎理道探歸宿庶幾扶經心易學遂在蜀蜀易昌資

中集說三十六力排冢中言鄭訓炳宵燭流傳迨
熙甯義海手弗肉房公蜀審權亦人百卷書人事省禍

福雖博苦未精有待薤繁複是翁生是時約守屏
塵牘善易不言易藉以遠朝局其學無可承其隱
信可錄其德靜如琴其品白於鵠君平久棄世開

簾匪狗俗笑彼洞與臺研朱耀巖谷

邛州有胡安魏了翁涪州

有程伊川樂山有吳秘點易洞又烏尤山相傳有郭璞讀書臺若此類頗多新祠今告

成末由薦杞菊敢告鄉後賢青雲步高躅隆昌知
縣朱雲駿詩先正昔有言易學在西蜀君平探幽
元列宿通嘉告數傳得希夷奧旨逾表褭薛翁晦

敘州府志

卷十一

壇廟

十

富順

名跡賣醬混塵俗道潔苟弗誠爾音闕金玉鍾靈
江洛間徘徊仰高躅使君汲古深崇祀高勉勗典
缺六百年舉廢欣環矚更聞曩氏易皎徹明晨旭
何當領微言相與勤纂錄易義無盡藏眞儒互賡
續蜀遊學未成耿耿動心曲邑人李芝詩翔鷗遊
紫霞潛虬溷塵壤隱躍希尸間踪跡何能做先生
探元旨金冊留餘響丹竈無由尋粉榆嘒榛莽至
理在人心吾道千秋仰振興會有時在晦光尤朗
賢侯蒞治初披古契遐想專祠崇異典度地占塏
爽時序越清和觀成通肸鬻匪僅贊幽儀於茲正

蒙養我懷桑梓義屏息瞻遺像善繼慙雅聲靈旗
迓焄恍神龜山嶺峯榮洛波清灤城郭憶當時高
風激吾黨

土主廟 治西北西湖右神像有十亦名十聖廟傳
云秦惠王時擒鼇治水有功隆慶年間建副使甘敬
修有記崇禎八年司馬楊述中重修參政劉之龍有
記不傳

〔知縣劉上駟詩重構三山宇方堪妥十靈擒鼇功
未朽治水績宜銘民出蛟螭室神安俎豆馨迄今
忘姓氏報德遡秦廷

張公祠 在治北今廢

明邑人李長春記邑侯振海張公任事凡六載以
治行高等召入爲工科給事中踰年矣邑搢紳大
夫諸生吏民環向猝嗟而嘆曰公去我胡遂以歲
計也已又曰疇復有崇潔廉嗜淡泊提身如公者
乎始公捧檄而西行李蕭然塗人不知爲墨綬甫
及下車齋宿而盟諸廟所不絕苞苴惜膏脂者有
如此水故事登堂則盛供張入室則參器用公悉
戒勿費僅取成享代匱而止居恒綈袍革履食脫
粟飯帷蓋雖敝弗易出惟攜一算器不陳二簋常

夜宿田家藉藁至旦諸所節縮卽寒酸猶難何論
肉食已又曰疇復有察疾苦籌利弊字民如公者
乎邑患賦稅不清猾胥巧於飛洒公素精算法每
按版籍手自指畫必令圭撮杪忽兩無所爽人不
得緣此爲奸例解納利徵奇羨公秋毫無取敝習
一掃而更之舊革行戶弗設猶時索市貨公身無
厚享餽無異物絕不問果布之湊間值公私費取
俸稍易之視市價爲準民近健訟則贖緩充斥公
於情實者文致者以片語剖判之辜者伏息者聽
終不輕罰一金邑非孔道郵傳弛而多敝公審率

若騎當役者藉其名次置之袖中魚貫而發雖旁
午不紊已又曰疇復有馭下嚴與人周遠嫌如公
者乎公初至誓吏胥於庭爾曹據縣如負嵎壅令
如煬竈羣不逞之徒伏翼而燎之於官民何有聞
者恇懼避匿率皆斂手結舌無敢違約束士大夫
蚤暮造請無倦色無竊詞各厭其意而去常戢閭
者令編氓闌入毋禁得匍匐几案白事邑產鹽鹽
有司率視爲奇貨公上狀所部請以抽抵驗放屬
之蹇使時令抱關譏察之有司第稽額課逋否以
旌勤惰不得復事訾省竟公在事羨金錙銖不能

污公復條上富產鹽地法宜寬寬則利饒而樂爲
瀘行鹽地法宜嚴嚴則弊祛而課足請罷邑之抽
驗徙而之瀘每歲額課令其代爲徵解議雖中格
識者韙之又曰疇復有倡經術釐文體造士如公
者乎公初試諸生文歎曰尺幅弊矣無甯易而奇
繪乃取樸者雕鏤之質者藻繪之淺而令深平而
令之屺渠夔曠然一變入彀者遂倍曩時公每評
隲文詞某當最某當殿悉如其言至導揚引掖無
間白屋穉齒士皆蒸蒸競爽已又曰疇復有憂災
疹竭精純回天如公者乎比歲亢旱者三四境告

急公每禱必步每籲必泣不憚剪爪割膚爲民請
命澍雨立應最後乘欵段屏驕奴巡行郊墟所至
延見田叟野嫗問焦枯計騰踊若家人父子然軫
未旋而雨遍山谷歡聲如沸故三歲中殍無澤遺
盜無野嘯視鄰壤獨甯已復環向吁嗟而嘆曰公
去我胡遂以歲計也先是公被徵以行士民遮道
揮涕而送者空其城野長老詫爲二百年所未有
今久而思思而望若欲再沾煦濡登衽席者不知
公方出入禁闥爲天子耳目臣非蜀人所得有也
博士羅君蔣君王君聞之召諸生語曰邑令向無

專祠無豐碑微獨里俗樸也三代遺直於是乎在
令百雉之外一畝之宮儼然俎豆公而崇報之非
託史筆勒貞珉奚以昭不朽垂罔極耶乃謁不佞
於里第述前語爲請夫由斯以談美匪溢有譽匪
節無史法具是矣彰往詔來甯是愚管不佞第撫
軼事曩公上計還楚無以充蜀道裝齎輒舉脂田
鬻之乃六載於縣署日與僮僕同甘苦食客有過
者惟壺餐相勞苦節而安公其有焉顧貞不絕俗
清不炫名內無町畦外無魁岸以和飲人而意自
消真卓然有道仁人也謹採搢紳大夫諸生吏民

敘州府志

卷十一

壇廟

十四

富順

合論書之曰此我皇明富順治平第一賢侯張公
紀政述思之碑用爲百事勸公諱濤字源裕號振
海楚黃陂人起家萬曆丙辰進士

滿公祠 在治東門內

水神廟 在縣南門左街口舊載蕭公廟舖房五間
廟前地基抵河

五顯廟 在縣南岸祿來山對南門學宮

炳靈祠 在縣南浦書臺右

龐士元祠 在縣東一里

天符祠 在縣西四里

升澤廟 在縣西十五里蛟角灘右岸宋政和四年
建明永樂元年知縣楊忠重修天順四年判簿李太
清祈雨感應教諭周齊己訓導蕭湍邑紳士賦詩并
序紀之

〔教諭周齊己祈雨有感〕序天順四年自春及夏不
雨田疇爲之乾坼而桑麻爲痿瘁水之素積者禾
僅半插民情惶惶莫知所措時判簿李侯太清視
篆方月日不暇飲食夜不遑寢處憂切於中乃自
責曰天雨不降匪惟下民實吾有司政治乖方之
所致也四月庚午命設壇於邑之元妙觀率僚屬

與凡庶民耆老緇羽童逢之士罔不恪遵乃事遂
齋戒宿外跣足徒行兩謁升澤廟請禱予等亦與
焉祝冊之餘誠意感通神物遄現恍若蛇虺長不
滿尺具四足身凝青碧背引金絲蜿蜒於廟宇之
東壁墜地出外而復來者再眾皆見而異之太清
曰此正所謂蜥蜴也胡爲乎來哉乃以手握扇近
取命左右置瓶中用靈湫水覆以柳枝使童子歌
云蜥蜴蜥蜴興雲吐霧降雨滂沱放爾歸去頃刻
間元雲四布雷電交作甘雨隨至夜抵二鼓少止
及四鼓又降人皆喜其誠心所感格而侯尙不滿

焉且曰數月之旱得一宵之雨不過滋乾潤坼而已烏能足耕乎丙子遍設壇於文昌祠不輟祈禱益殫厥心又三日庚辰疾風至西北起迅雷從東南震膏澤綿綿漸而不驟經宿乃止周視溝澮皆盈枯澤瀾漫桑麻禾稼勃然敷榮翌日乃領僚屬送蜥蜴於升澤廟開緘□□但見瓶水已空蜥蜴不知所適矣噫侯之精誠神之變化如是宜乎搢紳士夫繪圖以頌其實予忝同事祈禱目覩斯異因眾之請遂忘其固陋敘次始末弁諸首嗟夫士之行道濟世在乎一念之堅也堅則精神所致貫

乎金石通於神明此理之常不可誣也太清以昆明世家之裔公而恕簡而文治民事神能盡其道故化旱魃爲嘉祥變乾荒爲豐稔謂非一念之堅疇克臻斯耶昔百里嵩循行阡陌而雨下時人謂之隨車雨顏真卿決獄無冤而雨應時人謂之御史雨今侯蒞政祈雨沛然感通得不謂賢判簿雨乎指顧觀風采績彰聞於朝將見侯之美政載緒循良之傳顏嵩二公豈得專美於前哉於是復集所繪圖并敘搢紳士夫之歌詩刻之於石以垂永久云

賴雅廟 在縣北九十里明景泰二年建嘉靖六年重修

邑人劉用中記富順治北去百餘里鎮名賴雅四山碁布雙流帶環甚盛地也余嘗趨槐借道怪而嘆曰美哉山河之秀如此不有地靈乎人傑乎出於間果而突兀中起山林攸附曾兆示人曰吾泰山之神也如水行地無處無之意或眷戀於此福庇於此鄉人於景泰初年因創廟禱祀之禦災捍患其應如響復新於成化丁酉適主人郭宏字希仁誕生之年於茲蓋五十一載矣時移歲變風逼

雨侵廟貌傾圮神意若有不能妥焉者夜夢示希仁子盍爲我新之希仁夢覺語室人曰敬鬼神而遠之可謂知近之可乎然封泰山祀梁父或曰盛節此可坐視其毀不爲之新乎况近之之訓無妨於敬所當敬但患不能遠過於瀆耳遂啟諸家進士郭珠尊大人並母夫人僉許曰可迺捐貲市材鳩工鑿石卑者高之隘者廣之損者益之污者飾之殿堂後殿寢廡門墻四匝煥然畢備廟貌森嚴視舊益起人生敬畏矣所費木石灰瓦繪素共計白金九十餘兩無分毫取辦於人經營於嘉靖乙

酉落成於丙戌冬量功命匠不愆其期蓋有若神助之者夫豈無所應哉嗚呼崧嶽降神生申甫也禋祀上帝啟后稷也是知地靈未始不開夫人人傑未始不顯夫神顧茲廟貌重建希仁生焉神開夫人也廟貌將頽希仁新焉人顯夫神也希仁主器名惟恆者娶曾氏篤生乃孫適承新之日則是廟之新而又新不已有其人乎吾知前人新之後人監之後人新之又使後之人監之後人之監後人爲無已神其洋洋乎與天地相爲悠久也耶鎮人施秉厚輩以其事白於余曰此甚盛舉也不

可無記余故書諸石以垂不朽云

並縣志

天后廟 在治東門內乾隆間知縣熊葵向建

金川廟 四川鹽法志九域志云蓋鹽井神也僞蜀封爲金川王圖經云惠澤廟在監郭下井地主金川神姓王井主梅澤神姓梅梅本夷人在晉太康元年因獵見石上有泉飲之而鹹遂鑿石至三百尺鹹泉湧出煎之成鹽居人賴焉梅死官爲立祠僞蜀封金川王純熙中封金川廟爲永利侯梅澤神爲通利侯輿地紀勝富順監古迹又〔一〕統志金川廟在縣西二百餘步蓋井神也又富順縣志康熙四十年重建

道光七年買地鹽水溝改建原按咸豐八年總督王慶雲奏請

勅賜封號并定祀典禮部議如所請內閣擬進

硃筆圈出金川王封號普惠梅神封號普護光緒七年紳商

捐貲拓修總督丁寶楨奏請

賜額加封

欽頒有孚元吉四字額封號由禮部議未上新輯

南溪縣

社稷壇 在縣西關外一里道光十八年知縣翁紹

海培修

敘州府志

卷十一

壇廟

十九

富順南溪

神祇壇 在縣東關外一里

先農壇 在治西關外二里道光十七年知縣翁紹

海培修

厲壇 在縣西關外半里

文廟 詳學校

名宦祠 在戟門左

鄉賢祠 在戟門右

忠義祠 在戟門外左廂

節孝祠 在桂花街

關帝廟 在縣城內北明洪武中建

皇朝康熙六十年知縣崔光儀重建雍正十三年知縣李
閻權增修

文昌廟 一在縣城桂花街一在西大街

奎星閣 在縣城文明坊嘉慶八年重建

龍神祠 在縣城中大街嘉慶十八年知縣胡之富

改建

火神祠 在縣東大街卽古錫祿寺舊址國朝初年

改建知縣德明重修

眞武廟 在縣城棕林街明崇禎十一年知縣廖鳳

岐建

敘州府志

卷十一

壇廟

二十

南溪

呂眞君祠 卽呂祖廟嘉慶二十二年知縣仇如玉

倡修

城隍廟 在縣城東大街國初建康熙十年知縣宋

鑑補修嘉慶八年知縣張仲芳重建同治十年知縣

雷爾鄉重建

川主廟 在縣西五里一在縣東五里九龍灘岸

東嶽廟 在縣北二里瑞雲山明萬曆四十六年建

皇朝歷年增修

並縣志

武侯祠 在縣東關外宋慶曆中建

皇朝康熙五十七年知縣宋鑑重修

縣志

邑人包本芳詩漢闕荒涼紫氣沈靈旂暮雨樹陰
森風雲陣合龍猶臥祠宇春深鳥自吟西蜀挽回
先帝業南陽瘁盡老臣心大江東去經銅鼓付與
灘聲憤古今邑令翁紹海武侯祠後院供設前邑
令牌位記南溪縣自隋仁壽始越今一千二百餘
年矣尹南溪者宋以前不可考自宋紹興至

國朝縣志詳載政績僅得十數人甚矣遺愛之難也予
考四川通志按縣志所載十數人中失載有馮胡
二公甚矣遺愛固難而職修志乘者網羅散佚廣
搜博采俾後之人企德懷風不忘遺愛爲尤難也

道光丁酉冬修葺武侯祠成其後屋三楹舊供前
邑令栗主或複或舛或遺殊無軌則是時夷務軍
興臘盡甫畢予公餘之暇乃爲之補綴而序次之
考歷任名宦如程公球宋紹興中任馮公儼明永
樂中任劉公欽宣德中任鄧公壽椿天順中任張
公繹宏治中任路公義正德中任王公碩輔萬曆
中任鄧公壽椿張公繹縣志前後倒置茲更正胡
公愷通志不載其蒞任年歲故附於明代之後
國朝蒞任者康熙十一年趙公家駿任康熙二十年王
公大騏任康熙五十七年宋公鑑任乾隆十七年

王公采珍任乾隆二十六年崔公光儀任乾隆五十五年翁公霏霖任以上名宦十四位馮公儼胡公愷南溪縣志漏載照通志補入王公碩輔康熙間奉

旨入忠義祠宋公鑑仙源公所已立專祠故不重設牌位此外名宦十二位於道光十八年仲春謹立總牌一座俾春秋享祀武侯祠之日亦得分修祀事旣以誌邑人崇德報功之意而後之蒞茲土者能無觀感興起有慨於中歟又胥公尙棟牌位一座考縣志不載籍貫出身事蹟因供設已久茲仍其舊知

敘州府志

卷十一

壇廟

二十二

南溪

南溪縣事江西新城翁紹海謹誌

附新

桓侯祠 卽顯王宮在縣治北三元街

衙神祠 在縣署儀門外東

縣志

〔邑〕令翁霏霖南溪縣衙神祠記衙神之祠凡郡縣皆有世傳爲漢蕭曹二公亦猶翰林土主之祀韓文公也由來莫考顧其鑒察案牘孚佑官民書之於三策也固宜南邑衙神祠規模未備歲久更復荒圯予蒞任後每欲修之而未逮乙卯春捐俸爲倡而書役等遂共踴躍樂從因重塑神像換石礎整樂樓又新設門闌以分內外髹堊鮮明煥然改

觀朔望行禮之際倍見肅穆於地方均有裨益余喜其能急公也書之以告諸後

附新

于公廟 在縣東南隔江八里萬曆四十二年建

縣志

富順甘敬修于公廟碑記南溪爲敘之屬邑順流去東南五里有灘曰銅鼓秋冬水落石出灘稍平靜春夏泛漲二流相激萬石奔湍有似三峽之險商旅經此每遭阨焉予嘗因是而論三峽天下之至險也人惟知三峽之險故舟楫上下慎加防患鮮有所失過此皆莫知警而患生於不測者有矣孰知蜀江灘水處處可畏防患之密尙有所失况

懈怠乎此固有係於人而亦有莫之爲而爲之者萬曆四十二年四川按察使雲間錢公奉天子命來官經過此灘舟師怠忽至不測公因覆舟自櫓槩透身而起見于忠肅公命兩人夾持之順流幾三里許得南溪典史羅以讓驛丞李華放舟趕至幸得全生非所謂吉人而天相之者歟夫公之生全固係於天而天之險公亦有所自故周易有履險蹈危之說孟子有動心忍性之言夫豈偶然哉以常情觀之始脫須臾之患奚暇憂人之憂公則不然夷險一心人我無間惟其慮之也深故其言

之也切不有以告恐蹈覆轍而將來有不勝之患
乃賦詩二絕刻之於石用垂永久俾舟人之往來
者有所觀感而知登岸避險以免覆溺之虞然豈
獨今人之蒙其惠而已後之人有誦公之詩感公
之德者如觀甘棠而思召伯登河洛而思大禹又
同一景仰之心也嗟乎觀此一事尙利於人則必
能推此心以涖憲臺振風紀專激揚繩糾之任以
表率諸司操廉公明威之行以肅清四道郡邑畏
其風霜軍民霑其教澤蜀之人何其幸歟至若他
日居六卿總庶政觀日月之光華展經綸之事業

使功施社稷德被生民則又天下之幸豈獨西蜀
一方而已哉典史羅以讓等卽奉公之命同督建
忠肅于公廟於斯而刻詩於石復遣人走予請文
以紀其實予因憂居久荒疎於筆硯固辭不果姑
書此以爲記觀者幸恕僭云

新附

禹王廟 在城北水池街雍正中建

倉神廟 在縣署內

藥王廟 在城北街武廟側

庫神廟 在縣署內

蔡翁廟 在城南廣福門內乾隆四十八年建

昭忠祠 在城隍廟內西

遺愛祠 在武侯祠後道光十七年知縣翁紹海捐

建並縣志

忠賢祠 在武廟後

知縣宋鑑記張振德字季修崑山人祖情從祖意皆進士情福建副史意山東副史振德由選貢生授四川興文知縣縣故九絲蠻地萬厯初始建土牆數尺戶不滿千永甯宣撫奢崇明有異志潛結奸人掠賣子女振德捕奸人論配之招還被掠者三百餘人崇明賄以二千金振德怒却之裂其牘

天啟元年方赴省與鄉闈事而崇明部將樊龍殺巡撫徐可求重慶知府章文炳巴縣知縣段高選皆抗節死賊遂據重慶叛時振德兼署長甯去賊稍遠從者欲走長甯振德曰守興文正也疾趨入城長甯主簿徐大禮與振德善以騎來迎振德却之督鄉兵與戰不敵退集居民守城會大風雨賊毀土城入振德命妻錢及二女各持一劍坐後堂曰若輩死此吾死前堂乃取二印繫肘後北向拜曰臣奉職不能殺賊惟一死明志妻女先伏劍死乃命家人取火火熾自剄一門死者十二人賊至

火所見振德尸面色如生左手繫印右手握刀忿怒如赴敵狀皆駭愕羅拜而去事聞賜祭葬贈光祿卿諡烈愍勅有司建祠世廕錦衣千戶振德既死興文教諭劉希文代署縣事甫半載賊後薄城誓死不去妻白亦慷慨願同死城破夫婦罵賊並死之大禮守長甯城亦陷大禮曰吾不可負張公一家四人仰藥死贈重慶同知世廕百戶文炳長泰人萬曆四十一年進士除戶部主事歷郎中遷知府治行廉潔吏民愛之賊既殺可求及副使駱日昇李繼周等文炳罵賊遂被殺賊後知其賢爲

覓屍殯而歸之喪出江上夾岸皆大哭贈太僕少卿再贈太常寺卿世廕外衛副千戶高選雲南劍川人萬曆四十七年進士樊龍等變起高選適在演武場立遣吏歸印於署厲聲叱賊賊魁戒其下勿殺而高選罵不絕聲遂遇害父汝元母劉側室徐及一子一女聞變皆自盡僕冒死覓主屍亦被殺初廕尙寶卿世廕外衛試百戶崇禎元年子暄援振德例叩闕請優恤贈光祿卿世廕錦衣千戶建祠奉祀汝元等亦獲旌十五年高選子復以諡請賜諡恭節時先後殉難者灌縣蒙化左重率壯

士擊賊於成都力戰馬蹶罵賊死南溪知縣王碩
輔城陷自盡爲賊支解桐梓知縣洪維翰城陷奪
印不屈死典史黃啟鳴亦死郫縣訓導趙愷率眾
擊賊被刺死遵義推官馮鳳雛挺身禦賊被創死
遵義司獄蘇樸威遠經歷袁一修義不污賊墜城
死大足主簿張志譽典史宋應皋集兵奪戰力屈
死所司上其狀贈重碩輔維翰尙寶卿世廕千戶
啟鳴重慶通判愷重慶同知俱世廕試百戶崇禎
十二年重子廷皋援高選例乞恩命如其請間讀
橫雲司空明史列傳藁知奢酋之亂王公殉節受

敘州府志

卷十一

壇廟

二十七

南溪

毒最慘訪諸故老猶有知者僉云此地卽其受命
處也亟勒珉奉主同張忠烈諸忠賢春秋俎豆誌
景仰焉新
增

宋公祠 在城隍廟後知縣翁紹海捐建

魯班廟 在城西門內一智神廟並縣
志

烈女祠 縣治前康熙年間重建乾隆五十六年知
縣翁霖重修舊爲漢烈女黃氏祠今邑中節孝附

祀於此縣
志

國朝學使吳省欽題烈婦祠壁甚矣志地者之不可不
審也符有先絡熨道有張帛絡以殉父死沉帛黃

氏女以殉夫張貞沉沉十四日持夫手出於灘下
常璩志甚明白酈道元以先爲光以貞爲員范蔚
宗烈女傳傳絡事而不及帛又誤以絡爲叔先雄
因遍考搜神記太平御覽困學紀聞辨其同異熒
道爲今南溪宜賓二縣地敘州府志於宜賓烈女
言唐張貞乘舟覆沒妻黃帛氏求屍自沉於南溪
鴛鴦圻則云漢張貞妻黃帛沉此四川通志漢張
正船覆屍不得妻黃氏自沉江積四十日持正手
出員貞正形聲遞訛甚至誤漢爲唐考異苑華陽
國志太平御覽皆作正且十四日而非四十日予

維貞之名誤帛之心不安非爲張帛黃帛之可互
稱也帛祠在南溪縣治前歲久圯葺因倡以私錢
而縣令無錫祝君頌成之書之壁以稔來者

〔知縣翁霖霖記〕霖霖旣修烈女祠成諸里老相隨
展拜因召而告之曰爾等亦知使君修祠意乎天
地之性人爲貫人之所可貴者以其能全乎其性
而後得以所生還之天地性之所發爲忠孝爲節
烈伊古以來班班可考烈女事蹟具載在華陽國
志與夫吳少司空訂譌碑中不復贅顧以深閨弱
質矢志殉夫歷旬餘日而卒能手負所天以出此

其精神感召以視夫湘浦之染竹清風之投崖果
何如也使君蒞南邑四載矣每閱案牘卒鮮桑中
嘅殆俗尙敦龐今不異於古所云耶大抵人惟無
所觀感則隨俗波靡習爲故常以至夫喪廉恥壞
名節而不顧試與之登堂瞻像弔鴛鴦之清圻沂
鷺鷥之故蹟其有不唏噓嘅慕肅然而旋其面目
者必非人情吾因而知俗之純風之厚匪朝伊夕
之故也其由來者漸矣何則閨中者風化之原詩
周南召南二十五篇惟兔罝甘棠羔羊騶虞四篇
道及男子其餘則皆詠婦人之事蓋男正位於外

女正位於內男女正而化行俗美風氣自蒸蒸而
日上烈女夫張貞爲學士韓子方弟子必其刑于
有素而烈女曉明大義之死靡他馨香而廟食之
固宜其所然則發幽潛舉廢墜樹風聲而表宅里
誠司土者之所有事斯祠之修固非同諸梵宮道
院僅足以供焚香頂禮已也使君自愧力薄捐修
後復撥寒蓬寺田租九石五斗爲香火之資令鷹
嘴寺僧香山於茲焚獻繼自今祠爾等其守護之
香火爾等其整理之祠內所有竹樹山石爾等其
培植之愛惜之以無負使君意諸里老咸應曰諾

遂書之以勒諸石

〔知縣雷爾卿重修漢烈女祠碑銘同治四年春爾卿奉行臺省檄來令南溪始下車覽邑乘至漢黃烈女殉夫沉江事穆然正襟懼然改容作而嘆曰異哉漢京教化之隆氣節之重始於朝廷行於下國者一至是耶烈女故有祠在城東南隅去治前不數武走謁祠下見夫綵繪頽剝庭宇荒蕪松桷旅楹摧敗零落甚非所以妥貞魂旌淑範也爾卿嘗謂有移風易俗之責者以教化漸摩吾民而風俗斯美蓋教化者政令所漸播而風俗者教化所

涵濡先聖人垂訓於斯見之矣詩三百篇采風問俗之書感慨之吟柏舟之誓聖人悉取而列之經誠以世道衰微人倫道息凡忠孝節烈之行之可驚可愕者表揚之以風厲來世卽能使之重廉恥矜名節而奮往卓絕之行得之婦人女子爲尤難故於煒管之遺徽采掇綦備聖心之爲風俗計至深遠矣夫風俗之美必原於女士者何哉周南十有一篇召南十有四篇文王后妃德修於身化行江漢之作也其詩所言大率詠閨闈之靜好居多論風教之推行者蓋鮮而行于之化始於兄弟御

於家邦男正位乎外而陽教修女正位乎內而陰教肅男女正位而化行俗美若陶就甄若金受冶以正人心以正風俗此千古出政施令之定軌也昔賢建之意其在斯乎祠之修乾隆時學使吳白華少司空倡之前令梁溪祝君成之重修者爲莆陽盱江兩翁君今距翁君寄塘之修已閱一世矣爾卿於三君固無能爲役第莫爲之前雖美弗彰莫爲之後雖盛弗傳乃以中秋令辰諏筮吉日鳩工庀材經營締造榛芳斯剔堂構是崇池樹竹石修平絢飾庭樹菁葱蔚乎改觀歷五旬而葺事凡

用錢十七萬有奇工旣竣招邑人士肇祀新宮相隨展拜雲車風馬飄忽來下蒼藻蠲潔終祀益虔環門而觀者奔走相告喁喁於廣術下里嫫媪斯愛斯傳景慕興起皆知烈女之流風有以濡染乎南邦之遺俗凡我邑人內則之嫻婦德之懋將追踪於漢代眎昔而愈上也爰述前乎修葺之善導揚烈女之媿刻諸楹左而系以詩詩曰夔溪蔚秀琴岩炳靈篤生邦媛江夏閨英嚙雪飲冰滄松悅柏逝水不回驚濤一擲鷺鷥斷磧鴛鴦曲圻旬有四日攜手同歸范史無徵通志沿誤闡幽揚芳逖

稽掌故辨傳三泖蘇白華少司空江符絡連輝匾之

當楣為萬世儀用挹廉泉載營祠宇京兆董成謂前

令祝君也民歌且舞後賢接武閩嶠豫章謂前令兩資

儲香火翁君筠樓撥寒蓬德鄰韓姜翁君寄塘引

志健為士女贊以韓姜周度顧我何人克趾前美

黽勉追隨芬纂彤史非娛游目非侈外觀聿冀化

民表正形端行至則奇意誠則一芳萬垂型如景

坳臬蜺幢泣止竹裂湘波螿白摛文碑誤曹娥亦

有幽宮郭西三里女貞交柯韓張繼起東漢至今

千七百年於昭陟降觀感神焉伉儷允諧治化伊

敘州府志

卷十一

壇廟

三十二

南溪

始勗哉我民毋渝厥志寒江之畔古城之隈勒文

庭隅以詒後來郡守沈念茲題烈女祠詩遺廟南

溪不紀年江流活活映嬋娟漢家城郭今何在烈

婦形容尙儼然自有貞名光女史還留貞魄降神

弦謁來椒菊登雲薦嗟爾男兒當愧焉新附

岑公祠 在龍騰書院內祀唐岑參

土主廟 在縣西李庄鎮剏自前明今歷年培修

包公祠 在鎮江廟後祀包寬並志縣

天后廟 在城南順城街一在上桂里

長甯縣

社稷壇 縣西一里

神祇壇 縣南三里

先農壇 縣東三里

厲壇 縣北三里

文廟 詳學校

名宦祠 在戟門東

鄉賢祠 在戟門西

忠義祠 在泮池東

節孝祠 在泮池西

關帝廟 正殿三間雍正四年知縣李岑陞揖俸建

敘州府志

卷十一

壇廟

三十三

長甯

乾隆三十一年知縣宋宏塗補砌石坎增修後殿乾

隆五十三年知縣王廷瑞補建兩廊並牌坊敬書文

武聖神匾額

文昌廟 縣城外東岸

奎星閣 在火神廟前

龍神祠 在縣城外北岸嘉慶十年知縣陳廷鈺建

火神祠 在縣治中央為風化關舊址原名清風閣

嘉慶十二年知縣曹秉讓改建並縣志

城隍廟 縣治東百步明洪武中建成化十九年知

縣李昂重建

皇朝乾隆三十年知縣宋宏塗重建四十四年知縣曹世德增修兩廊五十八年典史王世燾增修縣志

明周洪謨記城隍廟之制傳記謂自神農黃帝而始古禮序百神之祀則無文故唐李陽冰爲縉雲令禱雨於其邑與城隍約七日不雨焚其祠旣而果雨陽冰爲之記曰城隍祀典無之吳越有爾歐陽永叔曰今何止吳越天下皆有而縣則少是知城隍之祀始於唐而未達於天下宋始達於天下而諸廟猶有缺者我太祖皇帝旣正諸神祀典及郡縣城隍神號以除亂經瀆神之弊而郡縣厲祭

必以城隍爲主由是天下之爲縣者莫不有城隍祀也長甯城隍祠大尹李公民望以神素著威靈蝗旱祈禱罔不有應乃撤其舊廟而一新之因請予筆其事以書於石予考之陽冰之記驗之永叔之言則知郡縣之有城隍祠者不特固國域民而已其殆能潛通山川谿谷之神以澤民物乎神能佑人是宜人之報乎神也西岷保障圖記新附

呂祖廟 在縣城東北

大禹廟 在縣北百步

桓侯廟 在縣治西街

川主廟 在縣東一里明洪武初年建並縣志

東嶽廟 在縣東一里元至正元年建明景泰元年

知縣吳師朱重建縣志

明周洪謨記古者諸侯祭境內山川泰山在魯境故魯三望泰山爲首季氏旅於泰山而孔子議其僭謂泰山不享非禮況職非大夫而泰山非在其境內者乎或曰天父地母父尊母親故郊以祀天子之所獨而社以祭地自天子至於庶人皆得以行之今夫嶽地祇屬也而東嶽又以發生萬物爲功故公羊子曰觸石而出膚寸而合不從朝而

徧雨乎天下唯泰山爾則其足祀乎天下者得非社之謂乎然而社之達於天下自古已然若東嶽之祀於天下非古也且古之祭五嶽者蓋爲壇壝而空懸耳自後魏始置廟於桑乾水之陰唐則各置廟於五嶽之麓至宋則東嶽之祠始徧於郡縣不特此耳古者祭五嶽之禮視三公不敢擬倫於天地後世禮加崇極故東嶽之號加於唐開元者曰天齊王加於宋祥符者曰仁帝惟我太祖高皇帝正祀典百神名號如五嶽但曰某山之神聖謨睿斷超越前代明足以服人之心幽亦足以慰鬼

神之靈一洗亂經瀆神之弊而可永爲千萬世法也東嶽神號旣正而郡縣祠祀仍舊蓋本祭社之意歟長甯東嶽祠在城東之高坂上溪流環抱地勢爽塏倚山爲殿左右爲廊前爲重屋又其前爲門皆元至正末所搆我朝永樂宣德間累修葺之景泰元年正月燹於夷寇是年秋縣尹朱公思通與邑人圖復之乃率子弟入東南山伐合抱巨楠以爲柱次者爲梁次者爲棟餘皆杉柏美材未幾朱公致仕歸今尹李公顯復率民搆重屋及兩廊皆如舊規而美過之邑俗好事鬼神旱乾水溢有

禱於祠輒致靈應故人荷神恩治祠事如家事旣成耆老李璿馬鏞輩以書來屬予記之惟昔子路問事鬼神子曰未能事人焉能事鬼今邑人能事鬼神如此其能事人矣乎人而能盡事人之道則爲善人矣善人者鬼神必相之而獲福於天使未能事人而第急急求所以事神之道神且怨且恫矣福云乎哉茲故書此以告我邑人俾知所以事神並求所以事人者若泰山之當祀與否辨之已

詳矣

新附

忠祐祠

在縣東北宋建明時重修祀宋巡檢柳光

采蒲果記長甯東郭之地高阜突起上有古祠曰柳侯邦人敬祀之予總角時肄業學宮聞侯之英烈足以警動斯人者甚偉心固異之詰侯之本末邦人蓋不能詳則歎曰史於汪錡猶有紀載而神功迹較著於此乃泯泯無傳薦紳先生顏其厚乎於是徧訪耆舊侯之大畧始得今年夏來補掾吏郡守劉公適新其廟若會於吾心者遂因公命而識之謹按西南夷錄侯姓柳諱光熙建隆乾德間爲西南巡檢使教令明肅動作有度十州五圉三

十九縣之夷悉嚮慕之瀘帥有伎刻者譖諸朝徙置內郡自侯不還羣夷狼顧薪芻之輸不以時入瀘州鼓鑄爲其所霸涪井牢盆之利漢夷爭之乍服乍叛迄於政和百二十餘年一方騷擾國用虛縻侯之威靈遠矣皇祐間夷酋嘯聚近郊憑高枕險矚視城邑邦人怖栗諸校白進豐者宣神言當自城西發礮石碎其攻具從之賊眾大潰頃見山間鎧甲森集若官軍至城賴以完晏州之變自春徂冬羣醜游魂睥睨雉堞逡巡不敢進然則侯之忠社稷死而不忘安可誣也嗟夫從古忠正之士

効力疆場往往因宵小之讒致多掣肘詩曰取彼
譖人投畀豺虎夫非以其污讎忠良爲國生患也
哉侯今往矣侯之靈使邦人歲時灌薦有司祈禱
雨暘皆應如響政和六年賜廟曰忠祐九年賜爵
曰侯是雖屈於一時而伸於萬世矣彼厚誣者湮
淪磨滅今安在耶長甯曩固樂國近歲疲於兵役
物力維艱故廟久墊圯未葺茲劉公以撫字餘力
咄嗟辦理一毫不徵之民而別駕羅公以儒雅廉
平左右其事凡經始於紹興戊寅歲十月之己酉
落成於十一月之丙戌於時不愆役不留而可以

竭虔妥靈是足書也因作迎神之曲以遺涓人俾
歌以祀侯其詞曰涓之山兮有靈涓之水兮濫觴
侯之宮兮上方瞻旌旆兮飛揚侯之來兮帝鄉顧
我民兮色康奠牲酒兮薦芬芳歌且舞兮樂未央
侯之是非兮昭昭不藏民戴侯兮父母十雨五風
兮登我禾黍民恃侯兮長城蠻夷底貢兮烽火不
驚侯無我棄兮濯濯厥靈於萬斯年兮祀事孔明
明李永通記神之有功德於民能禦大菑捍大患
者必建廟以奉安之若於長甯土主柳公是已公
諱光熙宋建隆乾德間爲嘉定路巡檢使操履廉

介惠被生黎嘗領土兵伐五斗團夷奮勇禦敵民稍得安公既歿世遠時殊莫究其詳一謂遇害而歿於此一謂被譖而徙內郡竟無定說考諸紀志言皇祐間賊復嘯聚圍攻涓井監流毒生靈久而未退人民驚怖計無所出時招安將白先楊神言自稱巡檢柳太保謂禦賊宜擊礮發石以碎其攻具賊必自退患自除官吏如神言一發果中賊夥遂駭遁去蓋神功也縣境賴以甯謐無血刃劫掠之慘凡庶民憂危吉凶禍福災疫寇盜之類咸皈禱之其應捷如影響合邑官民尊崇敬信而不敢

褻皆曰神之功德被於民者如此宜乎建廟設像以崇奉之庶幾有以妥神靈也政和六年賜廟額曰忠祐封爵曰崇應侯以彰公之英烈鄉之父老咸相傳神自宋元迄我國朝屢著忠忱或播靈於兵戈交戰之時或默相於舟楫顛危之際神功烜赫響人耳目是以加封公爵命有司致祭而尊崇之典至矣每歲八月二十三日適公誕辰邑之官吏士民自朔至晦各備香楮牲醴謁廟祈福禱災約計數百人作爲古今雜劇故事妝飾人物草木鳥獸之類以慶乎神甚至繁華修靡神以之樂人

以之歡四關各灌澆巨燭奉之重者五百斤次者三百斤自二十一日燃起至十二月終始盡非神之威靈足以感人動物曷克致是耶邑人崇奉之典愈隆愈盛不以富貴貧賤而有間但廟宇歷年久遠剝落頽敝不足以稱神居聳瞻視於是邑之善士李永崇等同心協慮運謀設策遍募官民長者化資僦工採運合抱香楠盡撤其舊而聿新之羣心忻躍爭先尙奇計日營作以圖成績期年而告畢其制廣三丈五尺深四丈高二丈七尺有奇棟梁雄壯斗拱峻嶒丹青絢綵熒煌輝映載瞻載

顧孔曼且碩較之於昔大不相侔矣經始於天順七年十二月初落成於八年十二月終其材木工資費白金二百八十兩飾繪費三十五兩日用工給費不可以數計也廟之後有樓曰家慶元至正元年建也前有樓曰福安國朝宣德八年建也咸磊魄傑出摩切霄漢門牕豁敞階除整飭五百年來未之有也樓殿既備公與夫人正位於中招安將白公三聖將軍景公昆季列坐於右井主靈官判簿土地之神列坐於左肖像凜然令人竦敬覩茲勝蹟足以見邦人好善之篤修造之勤神之孚

佑信可必也歲月漸遠恐後迷其所自故因諸掌
事之囑直述公之出處並經營事實以示後之觀
者附原

〔按〕縣志作土主廟

蕭公廟 在縣北百步〔按〕蕭公江西新淦人有道術
昇真後常顯靈於江淮間明景泰中封水府靈通廣
顯德英祐侯縣志

高縣

社稷壇 在治西

神祇壇 在治南

敘州府志

卷十一

壇廟

四十一

長甯
高縣

先農壇 治東半里

厲壇 在北郊

文廟 詳學校

名宦祠 在戟門右

鄉賢祠 在戟門右

忠義祠

節孝祠 在西門內北街

關帝廟 在西門外先有官田山地後民趙容捐沱

田一股千總段廷颺捐店房並山地載糧七升

文昌廟 在西門坳原有燈火田載糧二斗四升後

雷起捐業一分余仲掄捐店房三間周世蕃段廷颺捐業二分共載糧一斗六升一合每年資廟內焚獻嘉慶二十一年知縣盧燿移建於三台之右

魁星閣 在學署右乾隆間知縣李鴻楷重建

龍神祠 治東

火神祠

在小東門外附楊泗廟

並縣志

城隍廟 在縣城西門內建自有明

皇朝乾隆二十四年重修

縣志

〔知縣李鴻楷重修城隍廟碑記禮經無祀城隍之文或以爲卽蜡祭中之水庸也然神能禦大災捍

敘州府志

卷十一

壇廟

四十二

高縣

大患則祭以報之禮雖未有而可以義起故史冊所載漢唐以來皆列諸祀典至宋而廟食且徧天下其旣與山川諸神合祭於北壇而復立廟者則以祭必有配城隍有廟殆亦以棲配食者之靈耳配食者卽其方之有功德於民者爲之今欲崇德報功而祠宇弗治其不足以妥神靈而明虔恭也甯顧問哉高邑城隍廟在城之西乾隆戊寅秋余蒞茲土先期欲宿廟而無憇息所明日夙戒入謁見匠者方興工則前署縣因其圯而圖重修也維時平地一簣吏人以諸材不備告將奈何余乃捐

資程費復諭勸各士民量力相助而屬二三老成者董其事約費二百餘金六閱月而落成其規模中爲棲神之祠左右翼以階下對列兩廡安諸像其內後有僧房前有樓臺外有廡舍蓋制雖仍舊而若者補葺若者增設若者鏤刻丹堊夫固煥然一新也又先有置田產施爲常住者悉爲清釐俾免侵奪蓋至是余乃嘉邑人之誠於崇報共襄所事以克底於有成耳不然善始者不必善終安見一簣之遽能九仞而遂攘其功以爲己有哉抑余更有說焉神之所司者城隍高之城倚山今城門

敘州府志

卷十一

壇廟

四十三

高縣

傾圮修其廟而不修其所司之城門則無以衛吾民而神亦必不安余故以次修治皆所以默體神意也

新附

東嶽廟

在縣東門外一里

縣志

季鴻楷遊東嶽廟碑記嘗從臨淵閣下挽舟溯流而上見城東門外迤南一里紺宇琳宮倚於梯雲山側古柏參天蒼翠欲滴如畫也詢知爲東嶽廟一日乃偕賓僚往遊焉廟東北向前臨深溪源自右崖懸下鳴湍急瀨飛素流清淙淙然有聲汲以澹茗甚清冽邑人周皋門架長橋其上制如樓有

欄楯入廟者非過此不得其門橋之東有山自南
斜轉而趨北如右臂相爲捍衛上植桐桐數百扶
疎高下枝幹挺勁葉茂密如蓋濃陰不斷其西由
梯雲山斜下少伏復起爲冢雄峙於北如覆盆邑
之城緣之兩山之口一徑沿溪周折上通近橋二
百步內復有幽芳異卉羅生左右霏紅炫綠隱翠
約黃因風逞氣芳馥襲人時芳盛夏少憇橋上冷
趣幽光四面相逼日景方中無從穿下暑氣不入
外間闐闐囂塵杳焉隔絕惟聞鳥聲錯亂若與溪
聲相應而已噫此殆向來在舟內時所未得見固

不知林深處尙有其勝者也廟高下三層鏤金錯
采中有雙柏離立霜皮溜雨約三百年間物其後
崖青杉數株高出柏上中間相距二百五十步遙
遙對接合爲一色故自下視之直以爲止柏之杪
耳再上有地勢平敞倚崖之半高空無闕老僧云
昔嘗建亭其上今圯逕路絕惟扳壁捫蘿可上乃
止於是俯仰任放游目四矚復甯河繞其下波光
潏灩河東爲懷遠鎮綠野千疇而北望臨淵閣飛
清流丹漲煙迷雨宛在水中舟楫往來越陰度迴
蓋又如畫矣然亦不得見橋之所在也

丁公祠 同治三年知縣馬佩玖建係文昌宮舊址
志縣

馬佩玖丁公祠碑記甲子春余攝篆高州既下車
卽詢前令丁公遇害事高之人無不爲余泣述無
少遺其畧云同治元年十月髮逆石大開據筠連
我丁公以邑四圍逼近大山城窺下不可守親率
團丁二千餘人去城西三十里之落潤坎以禦之
二十八日賊大至團丁不能敵公單騎直前遂被
擒賊以公好官不忍殺勸之降不可賊將入城公
曰爾入城吾無以禦之然毋殺吾民賊許之曰吾

民不知爾之不殺若也吾將出示賊又許之索紙
筆賊給紙筆書成取懷中印蓋之賊大股仍駐落
潤坎遣僞先鋒李南率賊千人抵城張公示而後
入果不殺人民不知有賊而益感公德是爲二十
九日晨早事也先是賊至筠連公羽檄求救知楚
軍旦暮至是日旁午楚軍定武營曾先鋒營王護
衛營鄒至慶符聞城陷銜枚疾走直駐西門高邑
四面皆山獨西門一綫路東南北三面無路得出
楚軍於四山多張旗鼓喊聲動天地賊驚亂不知
所爲自相踐踏投巖墜城及殺死者相枕藉當將

縣城克復是夜賊大股退據羅家場十一月初三日賊眾怨公之賣己也殺之而投其首於糞池中越日賊竄橫江石逆執殺丁公者數之以其殺丁公也殺之後聞卽僞先鋒李南賊退之日國人得公尸又七日鄉人於糞池得一物滌而視之捧之而哭曰吾官首也奔送縣城環視之面色如生國人大哭遂禮而斂之嗚呼公可謂完人矣公不能滅賊於禦賊之日而能勦賊於被擒之後賊可以擒公而不可以殺公賊可以殺公而適以自殺卒之賊之死亡過半而高之民獨保全無恙可不謂

完人矣乎事平大府入告奉

旨照同知直隸州知州陣亡例議卹其明年德配羔宜人至高之紳耆釀千金贈之民情厚矣顧事閱三載而不爲立祠亦闕典也爰卜地於城西三里之西門坳地舊爲文昌宮自文昌宮廢而高之科第虛無人復舊制亦以培文運凡修正殿五楹殿有樓樓上供俸奎星大門五楹左右兩廂共用錢一千七百釧有奇藉防堵經費皆民錢也自五月二十一日興工閱三月而葺事落成之日高之人大和會香煙經旬不絕適因縣民劉文欽賭博案罰田一

區歲收租穀十石零又縣朱紹洪捐錢一百六十千押當田一區歲收租穀拾石以養住持永作焚獻湖北監生屈文遠捐錢二十千余益以八十千跟戶參生息每年得息錢十八千以爲春秋祭祀之需余卽以事上之大府懇請入

奏以光盛典嗚呼公可謂不死矣公諱良俊號虞門山

東癸卯科舉人同治元年閏八月到官距死祇六

十餘日耳

新附

二公祠 縣西門外關帝廟右祀明知縣余炳趙彥
基址石案猶存

敘州府志

卷十一

壇廟

四十七

高縣
筠連

譚金錢祠 在焦村今圯

衙神祠 縣署儀門左

並縣志

天后廟 在縣署右

筠連縣

社稷壇 治北武廟後

神祇壇 治北武廟後

先農壇 治北正殿三間左右兩廊各三間俱築高

臺磚石甃砌然後架屋于上中築方壇一座雍正九年知縣董元會建乾隆十六年知縣沈世基重修乾隆四十六年典史朱士鈺復建

厲壇

文廟 詳學校

名宦祠 在文廟東

鄉賢祠 在文廟西

忠義祠 在武廟側

節孝祠 治西北

關帝廟 治北雍正八年知縣陳善綱補修乾隆十

三年知縣沈世基重修乾隆四十三年典史朱士鈺

倡首重修道光十四年知縣誠斌梁如綱增戟門照

牆如文廟制五鄉亦多有之

敘州府志

卷十一

壇廟

四十八

筠連

文昌廟 治東南道光十四年知縣誠斌建五鄉各處皆有之

奎星閣 玉壺井景陽山水口坪豐樂場各處皆有

龍神廟 治北負郭一里乾隆三十年知縣周助瀾

新建乾隆四十七年典史朱士鈺重修道光二十五

年知縣舒鈞培修

火神廟 卽離明宮治南乾隆十年知縣沈世基重

修乾隆五十年典史朱士鈺添修樂臺咸豐七年知

縣張奮翼培修

川主廟 治東道光十九年知縣祝掄元建五鄉各

處皆有之

城隍廟 治西雍正八年知縣陳善綱建嘉慶初年

知縣王以中重建

相國祠 縣署旁道光二十五年知縣舒鈞建

仁廉祠 治東南文昌廟側祀歷任各官之有功德

於民者

禹王廟 治西北乾隆四十三年知縣何洛書建同

治五年四川提督胡中和倡捐培修五鄉亦多有之

蕭公廟 治北嘉慶十八年知縣王以中建五鄉亦

多有之

敘州府志

卷十一

壇廟

四十九

筠連

桓侯廟 治北同治六年知縣章肅建一在巡司場

一在豐樂場

並縣志

武侯祠舊祀五靈神乾隆十年知縣沈世基改祀

武侯

縣志

葉鳳立改建五侯祠碑昔先王以神道設教實與

禮樂刑政之化相輔而行者也祀典所載法施於

民則祀之能禦大災捍大患則祀之以死勤事以

勞定國則祀之非是族也不在祀典是明以黜邪

崇正之義昭示天下以崇報之文故兢兢於釐訂

之間不敢瀆也我邑舊有五靈祠創建何年封號

何代俱莫可深考相傳神於端午節前數日必附靈於人督率迎賽歲以爲常甲子秋邑侯沈公以兩浙名宿司牧茲土其視事之明年邑人迎賽如初公詣其祠見諸神衣分五色位按五方適然驚曰此非我浙之所謂五聖五通者乎方康熙二十二三年間已經江蘇撫憲湯公題毀而斯地尙胙蠻未旣乎况迎神賽會例禁甚嚴顧以五聖五通旣黜之神猶聽民間斂財結眾爲地方累非司土者之責而誰責也爰具其事請之各上憲議以漢諸葛武侯易其祀遷五靈神像於後寢勒石廟前

永禁迎賽蓋所謂修其教不必易其俗也上憲允其議遂捐俸加葺鳩工飭材以丹堊其上下諏吉本年八月上浣十日進先儒武侯諸葛子神位於正寢永遵祀典春秋致祭崇正學也嗟乎武侯之有造於我蜀也豈淺鮮哉跡其功扶一統勢定三分伸天威於七擒抒奇畫於八陣竭忠肝於二表垂大節於千秋外捍強內植弱近安夏遠攘夷鞠躬盡瘁死而後已揆諸祀典所云禦大災而捍大患以死勤事以勞定國殆無一不與爲脗合誠所謂儒者氣概王佐才猷煌煌乎指揮蕭曹而伯仲

伊呂矣蜀之郡若邑何在不祠而祀之而謂公能不議請崇報以昭明禋於未艾也祠前豎琴堂三間金碧輝煌築甬道三廂構門樓一座礮砌拜臺以嚴禮讓高勒垣墉以肅觀瞻祠既成囑余爲記爰敘其事以告之來者公名世基字雲士號東園康熙丁酉鄉進士浙江杭州府仁和縣人新附

東嶽廟 治東在景陽山腳咸豐三年知縣戴於禮建五鄉各有之

土主廟 治東

龍君廟 治東仙人巖下一在眞武山麓今圯

敘州府志

卷十一

壇廟

五十一

筠連

財神廟 治東

藥王廟 治南同治五年知縣王嘉瑞建

華光廟 治東一在巡司場

魯班廟 治東會府側一在南鄉魯班山今圯

天后廟 治東南乾隆四十六年知縣嚴肇墉建

報功祠 治東中祀巡撫馬吳守備何卿推官勞輔

相今圯

三公祠 治北武廟後知縣蕭昌建乾隆四十三年

典史朱士鈺重建

三勝祠 治東北旁有龍王廟碑一道

二郎廟 豐樂場嘉慶初年建

二神祠 治北一里今圯

殿堂 海銀場嘉慶年間建被髮逆燒燬僅存後

石龍廟 治南三十五里七星壩前明建壩中有土堆七所如星羅列故名

董子祠 豐樂場貢生尹至仁建祀董仲舒又名正誼書院今毀並縣志

珙縣

社稷壇 舊在南郊今擬改正每歲春秋戊日祀縣

敘州府志

卷十一

壇廟

五十二

珙縣筠連

社稷之神禮用少牢

神祇壇 舊在東郊今擬改正每歲春秋戊日祀風雲雷雨境內山川城隍禮用少牢

先農壇 舊在西郊今擬改正每歲迎春耕藉祀之禮用少牢

厲壇 舊在東郊今擬改正每歲清明七月望日十月朔日設城隍神行位祭境內無祀孤魂禮用牲饌湯肉等物

文廟 詳學校

名宦祠

鄉賢祠

忠義祠

節孝祠

關帝廟 在十字口南路東頭門之內拜殿三間前殿三間後殿三間向時元旦冬至

萬壽皆拜於此孝友鄉七甲八甲亦皆有廟並縣志

文昌廟 城南關東關上羅計何家崖及青山諸處多有但未列入正祀乾隆三十六年議於巒左另建以供祀事尙未舉行縣志

〔知縣賽璵重修文昌宮碑記縣治之北奇石層立

敘州府志

卷十一

壇廟

五十三

珙縣

一水環繞巋然操全邑之勝舊有文昌宮相傳建於萬曆六年以故前明人文蔚起科甲聯鑣仕宦於朝者往往指不勝屈嗣後疊遭兵火瓦礫無存而鐘簾猶然如故也歲壬申余來蒞珙適諸生李玠楊鵬袁士鑛謁余首以重修爲請余曰我

國家承平百年

聖天子仁漸義摩久道化成凡薄海內外罔不率俾矧文教之興甯獨遺於方隅哉爰是命工鳩材卽以三人董其役閱歲而功成仍請余記其事余惟

帝君之教化與學宮並重科名本於孝友德行發爲文章

持世訓人班班可考諸生實能體諸躬行不徒託
諸文藝將舉向之鳴盛一時者今復後先輝映而
余亦得藉一日之長成功於

盛世豈非厚幸與至邑之士民踴躍捐金者備書於左

乾隆甲戌仲秋日記

新附

奎星閣

城隍廟 在署左道北頭門一座正殿拜殿各三間
左右廊房各一間乾隆三十六年因地勢湫隘議改
建於城之兌方以肅祀事未果行

禹王廟 城內湖廣會館以禹初生於蜀而其後又

敘州府志

卷十一

壇廟

五十四

珙縣

導江導黑水於此地也

川主廟 城內及歇馬壩穆家灣落表場孝兒嘴凡
數處皆祀秦蜀守李冰以冰在此有鑿江築堰灌田
之功也

諸葛武侯祠 在集義鄉落亥堡中相傳武侯南征
渡瀘以後曾至於此今其西有孟獲溝

柳公祠 城西門外珙水之南祀宋西南十州五衛
都巡檢使柳光熙其巡檢司舊治內亦立專祠有勅
封顯惠公樓今圯

勅封普惠侯祠 卽珙水之神在城東南洛浦洞中

元時勅封禱雨輒應

楊四將軍廟 在羅星渡舊城內相傳祀宋岳武穆

部將陣亡之楊再興未知其由並縣志

范孝子祠 在孝友鄉楊滄灣乃

皇朝孝子范嗣鎮所居故里乾隆初年奉

勅立祠縣志

〔知縣曾受一懷符山范孝子詩親恩天罔極幾人
思酬報邑有范符山卓哉誠至孝至孝顯髻齡親
勞必代服母夜然竹紡執簡侍以讀弱冠登賢書
屢檄不赴職只爲一日養不以三公易亡何執親

敘州府志

卷十一

壇廟

五十五

珙縣

喪泣血廬於墓世俗侈浮屠獨擯遵禮度疎食經
手擘朝夕進一溢長號跪竈門悲風生兆域喪母
一如父哀誠感衢路鮮民不如死毀極致疾瘡惟
孝斯能悌受讀同師事惟孝斯能友自搗成弟器
惟孝能嫻睦喪婚助親族惟孝能恭謹老佃下馬
肅大事兩俱畢移孝欲作忠一疾竟不起徒爾賚
志終我甘蜀產名姜詩與杜孝鯉躍近竈前江魚
千里到匹夫能肫摯一節足稱奇品孝友全量不
止任天姿符山根至性尤能深問學希風曾與閔
惜未竟推拓我懷終天恨風木有餘悲劬勞毫莫

報對此淚交頤末俗天真耗甚不如烏鳥耰鋤生
德色名教賴誰扶明發起有懷盡人屬毛裏不學

范符山何以爲人子

新附

興文縣

社稷壇 在城南

神祇壇 在城南

先農壇 在城北

厲壇

文廟 詳學校建武亦有廟

名宦祠 在戟門左

敘州府志

卷十一

壇廟

五十六

興文

鄉賢祠 在戟門右

忠義祠

節孝祠

關帝廟 在縣城東南乾隆四十三年知縣朱邦潘

敬蒼相繼建修嘉慶八年知縣路雲瞻典史王煒重

修建武亦有廟明萬曆初建在城北

皇朝改建於東關外乾隆五十八年都司張玉公把總李

潤芳募捐重修

文昌廟 在縣城東北隅乾隆三十九年知縣潘敬

蒼建嘉慶六年知縣路雲瞻募修正殿十五年知縣

楊迦懌募建正殿兩廊及魁星閣以舊殿爲後殿建武亦有廟在城南學宮側乾隆五十九年國學歐全修庠生羅萬魁募建各鄉鎮亦多有之

奎星閣 在東嶽廟側

龍神祠 在縣東關外

火神祠 在縣關帝廟左乾隆四十三年知縣潘敬蒼建建武廟在南門外上羅計亦有廟

藥王廟

桓侯廟 俱與火神祠共址

城隍廟 在縣城東街明隆慶三年知縣鄭大本建

敘州府志

卷十一

壇廟

五十七

興文

萬曆七年知縣趙汝礪重葺

皇朝雍正十三年知縣錢師謨捐置香火田二處乾隆六十年知縣湯兆祥重建正殿兩廊建武亦有廟在城北

龍王廟 在建武城內營遊擊張永智募建

晉王廟 在縣東關外祀唐晉李克用

並縣志

張公祠 在縣南關外祀明殉節知縣張振德

縣志

國朝郎嘉卿記烈愍張公振德者天啟間邑宰也其生平政績余未深悉第土酋作亂時公方攝篆長甯及聞變乃瞿然曰興文守土甯堪失此遂馳奔入

城督民拒戰不克公乃朝衣北面稽首先令夫人
錢氏長媳顧氏次子鯤女淑英淑慶俱從容就義
公遂自刎家人舉火嚴英顧美等亦赴烈燄維時
據東南而死類皆忠義之所激而於倉卒中能首
先奮擊力盡則斃闔門捐軀僅遺灰燼孰有如公
之慘烈也哉朝廷之優卹史氏之特書固所宜然
而建祠立坊歲時祭享亦使千百世下昭昭奕奕
如見公於揮戈殺賊中耳甲戌季夏余署篆斯土
慕其忠謁其祠緣何庭畔荒涼盈廡傾頽憶鄭公
長濟修建以來歷今數十餘載後之人卽不能踵

事增華何堪此風雨之剝落鼠雀之穿啄哉嗟嗟
際此邊陲小邑民皆樸陋士鮮慷慨誰爲之炳炳
麟麟使公之氣浩然常伸於兩間乃一任其摧殘
彫謝此憑弔者之所以歛歔欲絕耳余雖半載之
使何惜數斗之糈縱不克壯厥規模媲美前人圮
者修之墜者補之以妥以侑俾公之英靈不終泯
沒亦聊以慰吾景仰之私云爾過此以往未之或
知後之君子有能光而大之者未始非公之深幸

也是爲記

新附

岱宗廟 縣城各鄉俱有縣在南關外建在城南五

里毓秀在會龍山文印在寶瓶坳躍龍在梅嶺靜安
觀側前有十王殿明崇禎間建今圯僅存兩磚壁上
有陟降厥士日監在茲夫微之顯誠不可掩十六字
明庠生楊啟泌題

昭忠祠 在學署東嘉慶八年奉文建立祀本邑出
師陣亡官兵劉廷元等二十八人知縣余炳虎移節
孝祠於已裁訓導署址卽以節孝改爲昭忠祠

節烈祠 乾隆三十一年知縣鄭廷烈建嘉慶十八
年知縣余炳虎移於訓導舊署茲在鬢門內

二郎廟 在縣東關外

並縣志

吳公祠 在建武萬壽寺

明樊垣吳公祠碑記吳公貳蜀敘政坐鎮建武祇
役大征歷綜理留守善後諸務胼胝先後九載惠
澤入人且復奏最誥封二親政績益茂倏聞大父
訃音至束裝南歸守軍士民攀臥弗獲勒去思石
於府門之左猶未已也復肅公像於觀音文昌二
祠之間俾得時瞻仰焉二祠乃公爲建武初創習
儀缺寺故捐貲於南門外建立大堂三間塑三寶
立萬歲牌以爲習儀之所因而留公靴祀公於此
庶幾公之芾棠與二祠相苞茂公之香火與二祠

相悠遠已公諱文全號梅野西粵柳州府賓州人
戊午鄉進士是用記之以識人心之不忘云

增新

馬王廟 在建武南關外

川主廟 在建武東關外明遊擊李棟題川主行舟

四字匾額禱雨輒應合鄉皆祀之文印鄉之廟其神

尤靈

崇應祠 在毓秀龍泉村亦卽川主廟內有龍君像

又名川龍祠明萬曆初建禱雨輒應

天公祠 各鄉皆有爲鄉民六月六日祈年之所毓

秀鄉龍泉井之天公祠爲萬曆初年建像以石製遊

敘州府志

卷十一

壇廟

六十

興文

擊李棟書有永鎮龍泉匾額

並縣志

都督劉公生祠 在建武九絲山下祀都督劉顯兼

祀其子縉今縣志名將軍祠僅存縉像

明李文續都督劉公生祠碑記都督劉公以萬曆

元年盪平九絲一時椎髻鑿齒之徒易爲衣冠文

物之鄉已建功臣祠於城南春秋崇報矣士民思

公不置復於九絲山麓建生祠刻遺像於上而以

當時勤事死節之員附於其側匪獨崇德報功之

大典抑亦鏡往勸來之微權也萬曆二十四年總

鎮萬公以都蠻久經盪平此疆永謐遂易鎮爲遊

府焉時都闔淡公來攝府事甫下車修蘋藻瞻拜公祠喟然嘆曰老將軍當代名將也無論崛起西蜀克建奇勳今之豪傑不能及雖古名臣雄將猶然難之至今譚者猶凜凜然有生氣顧可令其祠之傾圮而不爲之一記耶迺時卽問序於余余曰建置之非易易也開設初定未幾而旋失者不可勝數卽如河套交趾非吾中國內地耶迺卒爲北虜獯夷所據識者至今恨之矧九絲都蠻荼毒生靈不向爲李匡程信屢行征討乎甫還征卽負固而劉將軍設奇制伏不踰年而殲除大盡令其屬

我編氓與以內地而旋復旋失者殊抑且建立城所首置學校設膏火延師儒移風易俗不滿二十餘年而禮樂文章得與內地比隆較烈非劉將軍之功而誰功哉故議征之初都酋喪膽有孔明之天威臨陣之際身先士卒有武穆之英明建置之後民心順從有黔英之節制至於開所設學使千萬載被髮左衽之俗一旦而更新之竊恐三公不無少讓矣今朝廷隆待功之典卽使公子子孫孫世世鎮守茲土與國家同休戚可也奚止公一生祠也歟哉且公世德垂後迺長公雄才大略名擅

當代繼公鎮蜀楊酋俛首欽使東征令虎口無北向之胡人奉命方外俾扶桑無南下之倭寇而喬梓事業並彌天壤故知淡將軍豎碑之意隱然有遐思矣然余又竊怪譚事易任事難夫以九絲之險都蠻之雄劉將軍出萬死得一生而後克奏盪平之績則繼鎮茲土者當徐議而緩圖之也奈何都酋散在四方者尙有故土之思而一旦遽議移鎮何其速哉幸今之固若金湯者固都酋之所視以兌喙者也萬一狡焉啟疆潛圖不軌之謀則不能不厯當事者之憂矣猶恐劉公在天之靈不能

一日晏然安也夫欲思患預防爲建武畫萬世久安之術是故今日當事者之責而淡將軍威抱不世之略素欲接踵劉公之芳躅者吾知其必能開此而不令此祠之湮沒也已故因豎碑之意而并及之是爲記

新
增

崇報祠 在建武城南明萬曆初年建祠前有碑乃御史曾省吾等生祠也後圯遷文廟於其址

縣志

明陳文炳記崇報祠者像都御史曾公而思報者也按祭法曰以勞定國則祀之能禦大災則祀之乃生祠非古也其因功而報之思乎斯民也三代

之所以直道而行也此何可已焉都蠻蓋古西南夷爲曹鬼谷邱陵曼衍素患中土而於今猶甚往往焚我宮室剔我士女掠我旄倪高珙慶筠長興之民日不堪命將胥衣冠之俗而附左袵之長矣昔天順成化時十八萬兵征之而不克嘉靖隆慶間數十年撫之而未甯安所決策哉萬厯改元曾公撫蜀書其略曰聖明御極殊方絕域重譯納貢喁喁嚮化慕義無如蠻之負固者臣愚以爲勦之便總兵劉顯善用兵因被謗議乃蒙明主彰使遇之仁書奏上俞允之公奮然秉鉞歲癸酉三月如

敘誓師曰天子以蠻敷虐於爾百姓勦絕其命余恭行天罰嗟爾有眾勗哉有土漢兵十四萬公以意授顯顯以身先士如身之使臂臂之使指也遂誘縛酋阿苟等五月一日至凌霄寨拔之六月十八日夜斬首阿墨等至都都寨拔之皆阿二方三守九絲又阿大阻雞冠嶺九月九日乘蠻被酒斬關而入至九絲拔之其小寨以數百斬首以萬數拓地四百里獲蜀漢銅鼓九十三面凱聞上悅而告廟百官稱賀晉公右副都御史廕一子太學生總兵顯而下論功行賞始張官設學列雉爲城上

命曰建武所詳在大學士南充陳公碑中嗟乎漢通西南夷蜀父老不便也司馬長卿詰難之其言至今不廢云若夫六合之內八方之外有不浸潤於澤者聖君恥之而况蠻爲大患如今日者乎卽夜郎一線三年未克今成功數月耳人多言征蠻不便者假令拘文牽俗如向來撫議眞以湯止沸抱薪救火耳烏能成功哉公昔尹富順嘗歎曰南蠻在目中矣又元輔荊州張公素知公才主上諭公汝往哉推心委任置顯謗書不問公倚之如長城操之如嬰兒得其死力以報國兵法曰有必勝

之將無必勝之兵今觀之尤信讀宗功一記不自有其功意深遠矣越三年召公兵部侍郎蜀人建祠於新城顏其祠曰崇報深山窮谷龐眉皓髮之夫感泣不能去以爲拯已於水火之中也三代之兵如時雨公宜永祀茲土故參政李君江陳君大壯參議楊君一桂僉事羅君向辰命伐石紀焉炳謂公之功無論太常所書卽百世口碑亦然四君皆佐公有勞者不具論獨論其大者如此公名省

吾字三甫郢中人嘉靖丙戌進士

新附

石公祠 在縣署西門內以同治壬戌之亂死難大

吏奏請奉

上諭命建專祠

縣志

隆昌縣

社稷壇 在南郭門外

神祇壇 在北郭門外

先農壇 在東關外嘉慶四年知縣盛世綺重建

厲壇 在神祇壇旁

文廟 詳學校

名宦祠 在文廟戟門外

鄉賢祠 在文廟戟門右

敘州府志

卷十一

壇廟

六十五

隆昌

忠義祠

節孝祠

關帝廟 一在南門外乾隆二十三年知縣于中行

建一在城北舊名三義廟

文昌廟 舊在明倫堂嘉慶六年知縣盛世綺移修

蓮峯書院後

奎星閣 在蓮峯書院前

龍神祠 在縣南里許嘉慶八年知縣盛世綺重建

火神祠 在城隍廟左

城隍廟 乾隆五十八年知縣李明心重建

馬神祠 在縣署右

武侯祠 在縣北三十里迎祥街

采雲駿詩迎祥街謁武侯祠慨想高風佐命時出處不侔三代後馳驅矢報一人知紫陽史法祧餘閨張儼微文漫詆訾漢祚若非終四百壺漿中夏

勞王師

並縣志

五皇廟 在縣倉左

縣志

邑人胡克開五皇廟碑記按祭法能禦大災能捍大患有功德於民者祀之不則非此族也不在祀典爰稽搜神記五皇之名祀往代不同川中無不

虔祀無不顯赫四季歸其耑轄而於春夏間神爲政更靈醮建禳火逐疫以集禧蓋六子嬗化二氣迭相終始神有耑司五皇蓋五行之精也天地之吏也先是縣左文武祠前地鞠爲茂草一望邱墟時伏奸人窺伺晉興朱侯築墻百丈起左右銷銀房二十餘間建石坊一座木坊二座五皇殿樓飛甍丹敞壯麗令人瞻仰生敬事神也實以培縣治也同時三義廟成刊象妥神闔縣士紳咸稱曰事神如此事人可知卽今三年報最剡章首薦聖天子追厥自而錫之恩綸光前裕後崇躋威廡侯不

祈報神貺甯有既耶或曰龍閣有皇祠矣復祠左者何余曰朱侯匪獨事神以培縣也太老父母品重璵璠種學積善每遺書晦侯和神人綏士女侯恪遵嚴令事神以安民侯匪獨忠于國且以廣孝也異日者繼侯而建節川南不見我侯一斑哉然則五皇之禦災捍患功德及民祀典若增而光非卽侯之功之德垂不朽者耶余不揣不文謬爲記勒貞氓壽之邑乘焉

新附

東嶽廟 在石碾山

采雲駿詩磴曲盤空壁松圓臨古廊穆如偃象緯

敘州府志

卷十一

壇廟

六十七

隆昌

俯視成微茫雲嶠帶晴色溪風吹稻香何當遂初服丹井納新涼

川主廟 在縣署左

衙神祠 在縣署左

並縣志

韋公祠 在城南門內祀唐都督韋皋見通志今廢

貞烈祠 在墨溪上

縣志

明王應雄記夫辭之不可已也蜀女子有叔先雄者事與曹娥絕類而黃絹之文無傳傷哉唐李翱敘高愍女楊烈婦自謂不在班孟堅蔡伯喈下豈非事竒文核耶辭之不可已也如是昔孔子讀詩

至柏舟曰仁矣吾於柏舟見匹夫不可奪志也志士仁人嗜義而死死而得所詎易易哉求於褒博竝議之士或不得乃得之巾髮者流而說者以名心繩之悲夫孰謂女子婦人而甘名以死死而死耳烏知名且名欲不隨之能已乎余聞有司之祠貞烈而奮以熹及覩其事狀遺文又無不悽焉以悲者傳曰貞烈者楊中丞某之仲女小字二姑母王孺人生萬曆壬午年七月十五日甫三歲偶抱入家塾指授壁間句輒成誦稍長習孝經烈女傳內則諸書已益習女紅丙申歸郭生懋宏宏父某

官和州從之和會姑病祈以身代姑病良已己亥王孺人死庚子自和歸始知也一慟絕良久乃甦代翁姑侍王父母王父母深自慰藉與郭生相敬如賓佐治舉子業如畏友生力學而羸且病瘵已而病益劇割股和藥以進竟弗起持踵訣曰修短天也其若敖餒何貞烈泣拜床下搏胸搶地誓以身殉家人防之密弗獲遂中丞寬譬之汝忘訣時語乎微汝誰爲計者逾年翁姑歸中丞乃迎貞烈於家謝膏沐掃一室奉大士像列圖史自娛顧意中悒悒未嘗忘蓐螻蟻也當是時死易立孤難無

孤也欲誰立者無已從中丞官京師聞其姒錢再舉子則喜曰藉以報地下者其在此矣時郭翁守曲靖萬里持幣書乞嗣姒依違之再三約始定丙辰秋中丞持節過里會其姑以家居抵舍之夕貞烈卽取嗣子視之喜不自勝丁巳請王父大會宗黨名嗣子曰孝懿告於廟禮成謂其侍鬟曰吾事畢矣吾卽歸甯詰朝往大雨中道返懊甚明日閉樓作書徹夜繞閣走不寐又明日呼車如中丞所中丞察其色殊慘而謬爲歎語心疑異戒一嫗謹持之浹旬稍解報女縊矣端坐瞑目含笑以死時

五月二十日也含衾斂襦罔非夙庀一素練縫紉密繳女奴云是告廟次夕裂帛以製啟笥得三紙則前夜所寫者其一與中丞其一與諸母其一與諸弟阿姊又得絕命詞於衣帶間自前與生訣時佩之矣其詞曰妄心一片鐵不與紅爐滅瑩瑩未亡人茹苦肱九折一死鴻毛輕豈受風塵繼妾髮可剪頭可截悲哉何其烈也嗚呼從容較慷慨也有異貞烈稱未亡人且九年餘又孤已立矣假令中道氣阻悠悠終天年誰曰非高行者而卒踐旦旦之誓夫其視九年猶朝暮也視九年往之執手

契濶猶宿諾也視一日之未畢志猶負之未謝而九原之與俱猶飴之甚甘也求仁得仁又無憾太史氏曰以余所聞楊氏蓋世有女德云中丞王父以上有祖姑者生而孤幼弟孱甚如机上肉姑終身弗字以貞義稱撫幼弟成立蕃衍至今歲時祭祀無忘貞義也越六十年而有貞烈語云醴泉無

源芝蘭無根豈其然

新附

大禹廟 在縣北道觀山

縣志

屏山縣

社稷壇 在東郊

敘州府志

卷十一

壇廟

七十

屏山
隆昌

神祇壇 在城東郊

先農壇 在縣西門外二里

厲壇 在城東門外

文廟 詳學校

名宦祠 在文廟側

鄉賢祠 在文廟側

忠義祠 在學宮側

節孝祠

關帝廟 一在城內乾隆四十二年知縣祝頰重修

一在東城外

縣志

學使韓子允重修關帝廟碑記按祀典有能爲民捍災禦患則祀之馬湖舊多回祿之災嘉靖己卯歲太守乾州李公行簡信堪輿家說立關王廟於府治之東而祀以鎮之自是火患滅熄民獲甯居祀典攸稱但廟迫山麓逢時雨澇水溢衝決巖崩墻傾殿宇欹側民望弗愜實貽守土者之憂歲癸亥春節推望海馮公恕莅任初詣學行禮詢厥俊髦蘄新百度知湖俗之好鬼巫乃欲因其所好而示之以所當好歷覽境內神祠謂王之能捍禦災患祀之宜也况其忠義足以師表民俗而祠宇頽

敝民焉攸賴因祀典之正寓範俗之機非守土者之責而誰諉哉廼諗於二守一菴喬公椿亟可之以民之力於治畦未暇舉迨夏六月履菴宗公周來守是郡與馮爲閏戚齠齡莫逆行合志同政務暇議及是廟關係非輕理宜修葺宗公曰然協謀殫慮聚財鳩工各捐貲以爲之倡而募義者輸財効力之恐後廼命冠帶官袁琳文畿董厥役而馮公復時親臨督眡之易其椽桷罕其傾斜親其丹牘深溝塹固垣墻于廟之陰復壘石以當水衝等其階級以殺山勢前堂後寢各三楹盡仍其舊無

所增損獨改門樓三楹爲平屋欲其堅實而久遠也役始於應鍾三月至大呂月而事竣令民從役民咸趨之如子來不再閱月而就緒非所謂悅以使民民忘其勞者耶噫王之事昭烈非直平居不離左右雖顛沛流離之際死生未保而其眷戀之意未嘗傾刻或忘觀其辭曹數語雖老瞞姦雄猶且義之聽其自去不敢強留況生平忠義大節有不可一端盡者故後之仰王者不慕其有萬人之敵不慕其有斬將之能不慕其有震世之威其所拳拳瞻仰而願爲之執鞭者特以始終莫渝其節

耳至馬湖舊有火災而今無之者或其數之使然未必盡由於是廟之力而二三公因好鬼之俗假鎮災之名以修王祠倡導感發之機實寓焉已湖實邊郡自改設流官以來雖沾濡聖化已非一日而忠義或未純也茲特修王廟而新之俾民之瞻其殿宇肅然知畏仰其威靈翼然知敬想其忠義油然知慕仕者相與興於位儒者相與興於庠農工商賈相與興於市興於野而忠義之俗協然其大同矣噫嘻狄梁公奏毀淫祠清祀典也二三公亟修關廟正祀典也事不同而理同迹雖異而心

一夫豈徒崇飾神祠以炫民之觀聽哉銘曰惟神忠義厥性天植大節凜然炳曜典冊雖死猶生威靈顯赫矧茲湖郡民稠地窄消弭火災賴神之力量廟以祀之民志不忒圯壞不修民罔憑藉節推始謀貳守不逆太守曰然協謀定策整頽葺故新廟翼翼命民趨役匪疚匪棘爲爾捍災爲爾錫吉曰忠曰義是效是則涵濡日久服膺勿失風俗大同無反無側用徵不朽祇此銘石嘉慶四十三年仲夏月吉新附

文昌廟

在東門外

縣志

郡守劉應科文昌祠記余履郡之三日循舊典並走郡望驅車西出桂靄門見一閣高懸相者曰此文昌帝君祠也盍謁諸乃北入一小巷尋折而西夤緣登虛閣北轉門堂相接卽神居也狹且闔無以展禮竊陋之居無何關人失火比屋延燒祠亦被災焉維閣維堂炎炎隨烟燼矣余聞而駭焉曰神意也不安其陋矣於時田工方亟未可舉事至仲冬乃謀更置初得地於江北之隅匡山汪君不可曰咫尺郡東偏山之阿江之潭有隙地焉喬木垂陰廻峯毓秀倚寶珠而望太白是可以棲神也

相率而往觀之信乃詹元辰令梓人庀材巧人執
塤輿人具畚築芟薙蕪併手偕作至臘月業乃就
緒有堂有臺有廡有廚有門規度森嚴黝堊丹漆
舉以法初成召諸大夫士以落之禮行樂作觀者
如堵余亦登高而環望焉見水泠泠而東注山靡
靡以旁圍城郭迤邐而遙開林木蒼鬱而輝映嘆
曰美哉鬱鬱乎地之靈也諸君亦知夫神人相須
之義乎夫神非人曷因人非神不成向余始入郡
也見羣山疊翠江水環清草木光澤曰異境也悅
之嗣較諸藝見其文或博大而精或純粹而暢若

入武庫覩庶珍然曰佳士也又悅之既而稽境內
人物則寥寥無聞達薦紳惑焉乃今知地氣之通
塞人文之盛衰蓋有數存焉湖之地氣人文數將
轉盛矣神先知之乃假手於余闢茲善地以洩靈
秀而啟斯文夫士也懷瑰抱奇有素將必搏六翮
揚九苞彬彬然脫穎而出以應明神之佑焉此非
神因人以啟靈而人藉神以成其地也哉神人相
須固如此湖之士駸駸彙征業在不蔡矣嗟夫士
苟乘時自奮以臻人文之盛也豈惟章神之明抑
亦吾創事者之榮萬曆二十二年附新

魁星閣 在明倫堂後

龍神祠

火神祠 並縣志

署郡守史允庚火神祠記火神之崇祀也匪自今矣赤燁主令權司南方與靈威招拒司寒后土共治五行之事余莅郡三載郡人以祠請予曰雉堞瓦礫壇社茂草百廢具興余有志焉而未之逮而奚汲汲于火神之祀也郡人跪而請曰曩郡中數苦火患前有火盆山設海鎮寺厭之又於郡西偏立火神祠而火不爲灾憶少時見廟貌巋然國人

禱祝於斯焚獻於斯披草萊規故址亦猶復古之制也夫余曰爾亦知昔建火神祠之意乎祠在郡西於方爲金以生水則金不爲火尅且廟枕北爲坎勞卦火也而水制焉吾聞有功於民則祀能捍民患禦民災則祀况火神承宣天地之氣調其陰陽而彌其氛祲豈同夫僊宮梵刹偶然題作木居士者哉於焉筮日鳩工召匠塑神木則人自爲伐瓦則取諸舊陶一人有願一人之力鮮克舉也聚百人之願之力以舉之不數月而祠告成昔安樂叶夢於青龍而江流一木惠響聞聲於風雷而神

助千工今猶是也余嘉湖人之方以神道教也爲
勒石以誌云康熙五年季冬月立石附新

城隍廟 在北門內本舊府城隍廟今改縣城隍廟

志縣

〔教授茹甯重修城隍廟碑記夫信於神者必忠於
民故民神之主也昔之聖王先成民而後致力於
神故奉牲以告曰博碩肥腍謂民力之普存也謂
其畜之碩大蕃孳也謂其不疾疫蠹也謂其備腍
咸有也奉盛以告曰潔粢豐盛謂其三時不害而
民和年豐也奉酒醴以告曰嘉栗旨酒謂其上下

敘州府志

卷十一

壇廟

七十六

屏山

皆有嘉德而無違心也所謂馨香無譏慝也民和
而神降之福故動則有成也馬湖城隍廟舊在府
之東北隅蓋一郡保障之神湖民之所瞻仰者也
妥乎神必建乎廟新其廟乃安其神所以蕃孳必
告爲其牲也水旱必告爲其盛也戩穀必告爲其
醴也求無不應感無不通陰翊王化而儆惕人心
神之所司豈淺鮮歟尊嚴像貌鮮潔殿廡民之心
自有不容已也嘉靖癸巳孟夏初天久不雨本郡
伯關西李公偕節推景陵徐公往禱不旬日而雨
數至揖謝畢環視殿壁廡垣將傾圮鳩工而修葺

之以答神貺若磚石木瓦黝漆丹堊則主簿王文翼醫官鄭芳等捐資董工始於庚寅夏成於壬辰秋爰樹之碑而志之於戲不歆非類神之正也不祀非族民之正也人庇乎神神倚於人人之所行不負幽明默與神符吉无不利自有得福之道否則冥冥之中亦有主者神豈可厭耶是故爲人上者惠以利民忠也誠以事神信也忠則施惠於民之心多信則祈福於民之念博在民則先成在神則致力時當祀而告之蕃孳告之水旱告之馘穀中孚而人和誠通而神悅豐稔可歲登休徵必屢

見是蓋我郡伯公先民之忠致神之信之所召也廟之新豈緩哉故凡有事於廟者列名于碑陰以紀之嘉靖十二年端陽吉旦新附

川主廟 在北門內本舊縣城隍廟改各鄉多有之
黑龍土主廟 在縣西原按土主宋時人母夷氏過黑龍池感龍孕而生神名蠟曲體貌豐偉夷民倚仗居於沐川兵寇犯境神力禦之一方賴以安後歿於陣民懷神武建廟祀之凡疾病災患禱之其應如響
徽宗朝封黑龍土主其嗣曰惊任昭信校尉曰德珉
明洪武初授長官司職歷傳至夷太平夷靖皆卓然

有聲

于公廟 原按于公龍湖人名無考元時居對江副官村有道術縣治西二十里許有灘兩崖夾立狹且深舟行至此橈漿難施必登岸挽纜而上名拖船研公袖數卵石填之水勢忽展拓便於撐篙居民感之爲立祠於副官村之岸明成化年間土知府安洪奏請俞允構祠於望龍山麓並縣志

神木祠 縣西北三百五十里高現山下明永樂時

建縣志詳木政類胡廣

薛文清公祠 在書樓山麓久廢乾隆四十三年知

敘州府志

卷十一

壇廟

七十八

屏山

縣張曾敏重建縣志

邑人吳廷傑名賢祠考屏邑之祀薛文清公由來舊矣祠在縣治東四十里曰書樓丁酉秋桐城張公修邑乘屬余與徐君端木緝其事因偕至祠所見石坊二一曰名賢祠一曰名賢過化之地距里許又臥石碑三曰書院碑記曰遺化亭記曰遺愛祠記次第讀之乃嘉靖己丑郡守曦峯漆公登創立樓山書院於此樓曰藏書堂曰復性館曰文會至隆慶丁卯貳守中峩吳公宗堯履其地與諸生講論見羣英濟濟嘆羨之諸生對曰昔敬軒薛先

生講學於此爰是地多文士公領之白諸當道區畫祀典題書院正堂曰復性樓曰聚賢中置先生木主春秋祀之又貯五經四書及先生實錄要語並開示諸生以性命之旨嗣因公憂去諸生德之營建生祠於聚賢樓後又豎石坊於道曰名賢過化之地蓋感公之德因益佩先生之化於不衰也楊君養湛爲之譔記特詳閱三年而有對行李公充善與先生爲鄉人拜湖郡太守有政聲周君爻作記曰薛文清公晉陽人也少隨父宦遊龍湖築室書樓山以儒術淑彼鄉人後學景仰構祠崇祀

今李公亦晉人二公者一以文學鳴一以政事顯其與文清並祀也固宜合而觀之前後祠祀之者凡三始薛公次吳公次李公時代雖殊總之皆在書院之內第兵燹後同爲灰燼無可考耳嗟呼獻賊噬蜀陳奎乘之吳逆又繼之雖居民七百數家亦無一存者而又何問乎祠之爲名賢也而世之陋者乃指他祠之像以實之更揭百世文宗之額於其上謬矣或曰遺愛記中有肖公像語卽非文清意者其對行云余曰冕而圭非明制也且李公郡守胡能當此是說也張公嘗辨之因存之以俟

來者乾隆丁酉仲秋之吉記附新

吳公祠 隆慶間建增新

王詠吳公生祠記嘗閱馬湖郡乘私謂馬湖雖僻處蜀隅顧其地連越巂諸部實蜀之一大藩屏誠得長吏如漢龔黃諸人庶足仰慰聖天子西顧憂以今觀於中峩先生吳公則與循吏傳稱述無或戾也蜀人其厚幸也哉初公爲資縣令有聲當路交爲薦天子嘉悅詔擢大府同知府之人悉知資政一聞公來皆舉手加額曰朝廷以吳公生我矣公旣下車則訊民所疾苦汲汲焉思與改易絃轍

敘州府志

卷十一

壇廟

八十

屏山

其大者如豪胥之肆婪也應支之糜重也顧募之科擾也土副之需責見面也驛丞之索求常規也一一廉得其實則嘆曰此皆所以病吾民也乃下令舉行鄉約嚴立保伍差等一府徭役均節四司里甲革去行頭取用平值身先率下自是威惠旁流宿弊一滌矣府故無義倉公以爲憂迺倣朱子常平之法行之民甚稱便他如泮池樂器城隍祠南北壇永豐預備等倉龍湖沐川等書院皆關政治教化公悉一一修理然毫髮不以煩民多出自俸金否則公弗爲也沐川土官家丁有銀瓢爲民

所奪者訟於公公知其當償顧民業已服罪遂捐金以給但薄責其民民用感泣獄有久難贖罪公憫之止稍示責戒卽爲釋放免贖鄉約中有老嫠孤獨者則推古先施之政急發布米賑之蠻夷司有文土官者桀驁不法則如法以訊雖以權貴人書至惟附置庫存耳其扶弱鋤强大都類是每遇節令則令吏卒各歸以修歲嘗曰若等咸有祖宗親戚不可因在公而廢也此其仁慈逮下與陽城遣諸生歸家甯親意何異哉至於一切稅歛供億銀兩祇許平收未嘗增添纖毫如世所謂加耗也

府故有虎患甚則出入城市公廼取獵人居太洪山賞以銀米得虎凡八厥害遂除人有宏農之頌公自奉甚約在府及公出悉澹素如書生未嘗兼味行部間有稍如往侈者悉拒不納上官交重公獎薦甚多諸寮屬稱慶悉爲謝却迎送貢士故事具花幣筵席以候公祇令果酒二行不令盛具尤敦禮縉紳加意學校如鄉士夫張君鎬之有疾也旣親臨視疾復延醫治之歿則厚爲賻奠情文兼至至政暇則進諸生於庭語以身心性命之旨又必親爲課試樂育不倦若童生則命戶長暫爲優

免使得專意學業諸生中如曾堯臣輩則給以鹽米周以筆札諸所作興皆希曠典也故一時之雲蒸雷動多感奮興起蓋公舊得此道正脈於道林蔣先生又發明於大洲趙先生妙悟精詣久益完粹故本源澄湛而作用不羣所謂篤實而光輝者也公至馬湖卽謂此爲薛文清先生過化之地乃祠於樓山書院其崇正學表先哲以啟迪後人心可覩矣公終日危坐公堂雖應接萬務而實一眞自矢曾不爲所轆轤每暇則坐中峩行窩中默識究竟以證道妙詠始晤公見其粹盎不凡知爲有

道士及數聆警效益知公學以經政政原於學皆人所不可及非但如昔人所謂文章緣飾吏事也公以元年夏末莅任方及二載不謂遽聞太翁訃音號慟幾絕夜卽出印以授佐領凡饋饘奠儀一切不受府之人聞公此行莫能攀臥哭聲震原野於是鄉約之民朱愈袁啟賢等僉同謀建公祠徵言於詠詠昔寓居金沙金沙人頌公德政殆不容口時公轉馬湖已一年矣詠擊節嘆曰嗟乎士君子平居常病世不我用及用也卒不能樹尺寸以垂不朽此何謂哉志不素定而豫養也如吳公者

所至卓然有聲真可謂殊絕偉丈夫也夫馬湖自廢安氏以來長吏不知凡幾矣未聞有專祠之者卽祠之未聞生而祠也公牧斯土未甚久也人卽戴若父母假令再得借寇當必倍極淪浹人之懷思當何如哉傳謂盛德至善雖沒世不忘公蓋有之然馬湖士民懷恩思報卽能肇建此祠亦可以驗人心好德之良鄉約化成之敘也詠謂是役也守令聞之則可以作慈士民聞之則可以作忠其培於道不小矣今天子方徵用良吏以乂安宇內公行且翼亮鴻猷經緯太平其受福固不獨一馬

湖已也公名宗堯字協卿中峩其別號也先本浙姚人其祖以直道忤當時謫戍雲南之大理後移騰衝衛遂爲滇人至公父執齋翁乃魁秋薦尹東鄉有善政世德淵源遠矣今不具載至民所以祠公之意詠敢不備書若建祠諸姓氏則別勒諸石
隆慶三年

遺愛祠 在書樓山麓祀明郡守李公充善今圯

縣志

〔宜賓周爻李公遺愛祠記遺愛祠昉於春秋時子產爲政民有章黼充衣之謠曰子產而往誰其嗣之仲尼稱之云古之遺愛也生祠昉於漢于定國

爲廷尉治獄平允民自不冤漢人德而祀之世代相沿考古秩祀曰法施民曰忠勤事曰勞定國曰禦大災曰捍大患凡茲五功統崇祀典我聞在昔宣廟有學士薛文清公晉陽人也少隨父宦遊龍湖築室書樓山以儒術淑彼鄉人後學景仰構祠宇以崇祀至今嚮慕不衰郡守對行李公亦晉陽人少負騫才領鄉薦謁天官拜平度濟甯刺史擢開封丞晉思南太守公秉心淵塞敷政平恕所至宜民宜人頌聲不絕前年復除馬湖太守時有新城之役號稱煩劇值秋潦衝突圯嚙幾半切責所

司矢心秉公督作詳慎不踰時俱繕輯完固監司聞而喜之前日僨事者得開釋矣其以佚道使民有如此者先年郡土侯常賦之外歲徵氈糧若干改置流守因循舊政公至踰年日擊小民氈賠之苦條議上請俱獲蠲除十年可省萬金其蘇息民財有如此者府屬長官四司置在邊徼丁力寡鮮夷獠十七土民十三邊隅多事征調靡甯奪農戒兵了無虛日公惻然傷心乃條議凡四司官舍家丁操戈挾矢者著爲兵編氓牧養秉耒荷鋤者卽於農康功田功其節慎民力有如此者又以丁糧

差使坐派殊科有乖正體今更定通融均攤夏夷
稱便銀力兼徵斟酌時宜補偏救弊善政種種難
於殫述古之所謂良二千石者非耶一時惠澤流
溢湖之民懽欣鼓舞輸財木構祠宇肖公像以志
遺愛乃書樓里庠生楊一純龐汝學走余告曰本
里父老率眾數百餘家修建公祠與薛公並峙已
就落矣所期媲美棠詠追配碩儒丐予作記所言
如此又曰二公皆晉人一以文學鳴一以政事顯
均之爲聖人之徒今昔人品不甚相遠賢關聖域
希之則一嗣是而有實心愛民欲爲君子者則將

使後人而復祠後人也謂二百年來爲曠世僅見
者矣語曰一命之士苟存心於愛物於人必有所
濟况郡守也疇當爲循吏作傳公名充善字子性
對行其別號云隆慶六年季春月

新附

土地祠 在縣署儀門西

鎮江王廟在東城外

邑人吳廷傑建鎮江廟記

聖天子四方清宴百川効靈固無所謂淪胥與沸騰也而
祀於海者曰天后祀於江者曰將軍凡操舟爲業
者咸家戶戶祝焉而商賈之徒尤極崇奉備至肖

其像崇其居金碧其身而輝煌其宇神之爲靈昭昭也屏山古稱夔國據金沙江下流其源發於滇南而兩崖壁立一水中流曲折將千餘里其激而爲灘也水與石爭湢澗瀆瀑溯洄則恃篙力溯游則恃梢力偶失勢則俱屬波臣甚可畏也矧其地之分隸於永善者又爲銅斤所自出地險而勢阻境促而形紆自解纜以至泊岸中間凡一十八灘類蹲鴟以待焉是不可無神以相之相之者鎮之也鎮之者何神力爲之也試觀千條雪浪萬頃洪波與夫蛟龍之怒風雨之號懸岩墜石之奇咸若

送若迎而中流自在此豈非神之力而誰爲之耶江所在卽神所在神以江爲職守江以神而安流猶之五岳各有所司而四瀆咸奠其位也蠻夷司附近屏治東南距縣百二十里東通敘瀘南入雷黃北上嘉雅爲舟楫往來之衝每歲六月天貺爲將軍誕辰一時斂金赴會飲酒歡呼者奚啻數百人而拜楫趨蹌苦於無地戊子夏王君欽文首倡其事乃隙地於文昌宮之側擔土砌石鳩工庀材以鼎建茲廟計更始於壬辰初夏而落成於癸巳仲秋其材木則不採於山而漁於水其位置則奠

居於兌而兼乎坤尾蟠後山首注大溪與對岸之
關帝廟南岸之廣福寺遙相鼎峙焉由是而燈燭
光連星斗鐘磬聲徹江河鼓柁者咸慶安瀾揚帆
者羣欣浪靜凡急公奉上而踴躍以從事者皆得
履險如夷以無負上憲採運之意其爲功豈淺鮮
哉是爲記乾隆三十八年立石新附

馬邊廳

社稷壇 在南門外教場壩

神祇壇 在南門外教場壩

先農壇 在南門外教場壩

敘州府志

卷十一

壇廟

八十七

馬邊

厲壇 在南門外教場壩並廳志

文廟 詳學校

名宦祠

鄉賢祠

忠義祠

節孝祠

關帝廟 城內南門萬曆十七年建廳志

〔牟志夔關帝廟碑〕新鄉鎮湖郡西南鎖鑰也戊子
臙夷之後大中丞報成以請今上始賜名遂剖符
設官修城集民諸營壘環捍周衛屹然稱重鎮焉

於時百度聿新首勅祀典先是涼山軍中見關聖
輪刀西向乃殲醜虜故開建楚襄汪公特剏關聖
廟於南門殿宇堂構頗亦整備第基址湫隘壯麗
猶缺故附載廟制於徐中丞去思碑中未遑勒石
自是聖昭厥靈福蔭茲土靡有弗屆城中曩遭祝
融之變屢獲返風鎮之士民將領咸體聖德歲時
祈報維謹甲寅孟冬今上命司禮監冊聖伏魔大
帝神威遠鎮天尊關聖帝君贈冕旒玉帶龍袍圭
璧勅中外有司士民慶賀三日說者謂帝殄妖護
國之威故有是命此卽內史所稱有道之君齋明

中正精潔和惠德足以昭馨香惠足以和民人故
神明鑒之觀其德政而均布福也猗歟休哉惟時
蒞事有哲有愚有竭力殫慮恒順德意者有因循
苟且緣飾故事者郡丞清軍段公大欽明制屬鎮
捕廳楚黃徐君鼎新廟宇經制冠袍以仰副睿旨
遂爰胥故廟恢張式廓貲具輿人工諧諸匹交手
合作未朞月而堂殿改觀門屏如制黝堊丹漆咸
舉以法帝象端冕凝旒巍然儼然萬世而下懍懍
有生氣也且置常住田畝有租廛宇有課尤足以
給焚獻備牲醪焉功竣當事者屬記不佞余惟重

黎正位以來神人攸奠君有明德神有顯道故周稱懷柔百神及河喬嶽允王惟后今聖民在宥民和神享而妖蜮殄滅海寓晏然茲之章報隆封與威靈赫奕蓋兩懋也而新鎮以戎馬之郵臣民祇奉不忝休嘉帝之陰翊一人睠茲邊服俾董事率作於前則右貲政徐君成全合小大於後則永甯經府司朱君也他若鎮之士庶營之偏裨黨之耆彥及備之工咸輸斗粟之貲佐拮据之力者例應備壽貞珉岿萬厯四十四年歲在柔兆執徐南呂

上浣之吉

新附

敘州府志

卷十一

壇廟

八十九

馬邊

文昌廟 城內西北隅營盤山腳下舊有基址嘉慶七年奉

旨崇祀署通判周斯才興修地勢高曠殿前奎星閣極其雄

傑登覽四望山川厯宇豁然在目

廳志

周斯才重修文昌廟碑記竊維三才並立兩大固足配德人獨以渺然之軀處乎其中蓋有合神鬼爲一致者矣孔子不語怪力亂神而盛稱鬼神之德豈不以遺形體噓大塊彌六合包宇宙人之爲道至此始全然後可以參兩言三用以不匱粵若盤古伏羲神農黃帝神而人者也堯舜禹湯周孔

人而神者也故孟子曰大而化之之謂聖聖而不可知之謂神夫然世所傳文昌者可述焉考北斗魁上六星曰文昌見於天象稱吉曜焉於是陰陽術數之家動以爲言迨後傳其降世徵其事實其說益著以斯才所歷如梓潼之爲故里越巂之爲經遊凡夫顯應流傳遍諸天下立言垂訓崇奉藝林有班班可考者歲在辛酉季冬奉徼署篆龍湖下車之初恭逢

聖天子崇祀盛典治屬舊有宮祠規模狹隘殿宇傾頽間往相度流連久之不禁慨然曰是何足以副肸鬻

明禋之意乎於是紳士楊泰儀劉廷基張正榜等咸以修葺爲請遂允其行方設簿勸募然終以地方跼蹐爲憾暇日登臨偶至後山見廟右有隙地詢爲民產董氏之業董生文燦姪鳳廷皆郡庠生因延至以故告之生故慷慨士也聞之欣然樂施焉於是擴其舊基正其門向庀材鳩工始於壬戌仲冬迄於癸亥春莫適永甯余觀察建昌方觀察敘州淡太守查辦夷務先後按臨邊地恰值落成取向正對蓮華峯中爲正殿五楹前設奎星閣後爲啟聖祠依城而建殿前兩廡俱因舊制增而廓

之豁然改觀此山靈脈發自峩眉綿亙千里至大有岡分支脫卸凡六起伏蜿蜒以及營盤而宮之建適當其唇前爲大河雙虹齊落形如渴驥奔泉水口關鎖重疊岸沙隱然真武左掖鍾山右抱或靈巒飄緲或秀髻聯翩而金蓮正峙仙掌高擎煙飛雲斂晦明風雨之間其態百變河山勝槩歷覽在目洵足以快登眺而壯遊觀焉夫天下非常之事成於暇豫者恒易成於艱危者彌難是舉也方經始之初會峩雷猓夷作亂緊與馬邊接壤癸亥正月涼山出擾焚掠邊地岡外廻龍等處地方流

民雜沓邑境靡甯其時以國事倥偬更相撫諭而士民之踴躍赴工者昕夕不懈繼而團集堵禦請兵防守幸獲貼然無患而宮制遙觀厥成則是盤根錯節之時而堂奧於以妥侑豈伊人力抑亦明神實式憑焉爰縷舉而爲之記

新附

奎星閣

龍王廟

火神廟

城隍廟

東嶽廟

在城內

在城內

在城內

並廳志

西門外

廳志

熊德藩重修東嶽廟碑記天下之能應順效靈爲民禦災畀福者名山大川也山川者天地之司牧也天之愛民甚矣顧雨暘寒暑之失時豐歉旱潦之不齊天之權專而難遍爰分其事於山川故天子祭五嶽四瀆所以崇有功昭報典也又曰五嶽視三公四瀆視諸侯是則山川之神五嶽稱尊五嶽之中泰岱爲宗夫岱處於東於行爲木於時爲春萬物之所託始也知所始者必知所歸故其權兆於有生之初而不可揣測其祠徧海隅與社稷並列亙古而莫之廢其所從來尙矣馬邊枕山帶

河夙號名區而風雨時若人無夭札咸歌樂土者惟神之功卽廟制未修尙將鳩工庀材金碧其像瓊瑤其宮以爲闔郡祈福之地矧勝蹟儼然顧令其傾圮而弗爲更新如崇德報功之典何記曰有其舉之莫可廢也則崇廟貌而昭祀事誠不可已也第廟久不治風雨摧剝殿廡門墻率皆敗壞像設僅存至或露處雖云因舊起廢不啻再造所賴大眾嚮善方克底績今首事等以緣化從事毅然興重建之舉基視舊址棟宇創新由內而正殿而靈官樓外而演臺及兩旁頭門俱巍然煥然足壯

觀瞻滿堂神像裝塑尊嚴更添設兩廡奉十殿王
將謁者如見又濶買廟地以供焚獻廟制益尊不
誠盛哉是功也始於乾隆乙巳秋竣於己酉冬約
費數千餘金合本郡仕宦衿耆商賈軍民等共積
而成迄今殿廡更新門堂重麗石砌堅完垣堦峻
整神所憑依將在是矣以時告虔何弗肅焉指山
高與水清知百神效靈所以沐休祥而臻熙皞曷
有旣耶功成不能無記爰將厥功原委詳壽諸石
非沽名也聊以俟後之君子讀碑而諒繼事之衷

歟

新附

敘州府志

卷十一

壇廟

九十三

馬邊

西嶽廟 在城內

壁山廟 西門外

太子廟

禹王廟

巡撫廟

衙神祠 俱在城內

天公廟

五皇廟

山王廟 俱在官湖鄉

並廳志

武侯祠 在城北一里許

廳志

張世寬武侯祠碑記國家揆文奮武德化遠被百數十年海隅日出罔不率俾龍湖郡爲蜀南邊徼之區山環水繞村落星布自設廳治以來休養生息漸睹聲明文物之盛諸凡廟宇有關祀典者靡不次第舉焉城北里許舊有漢諸葛武侯祠考其始建在萬曆戊子歲與城內武帝廟城隍祠先後興修罔替祀事邊志備載焉蓋神之功覆庇邊黎凡吏民所當崇奉以垂永久者也然歷歲旣久風雨剝蝕或舊且頽矣先是遼陽孫公蒞任茲土重修後殿輪奐初就而規模究未完備越乾隆癸卯

秋士民詣廟瞻拜見祠宇將就傾圯慨然有復興之志僉議建簿募修地仍舊基山門之內增修戲臺復議更正殿宇舊閣有志而未之逮也復於乙卯春攝本廳事德公首捐清俸爲吏民倡首更修廳樓隨卸任正殿僅加補葺未大壯厥觀是望後之樂善好施者共襄乃事俾勿廢墜賢大夫之功焉則士民之幸也是役也起於癸卯之冬十月竣於乙卯之春二月神像尊嚴體制崇煥墻垣宏整於祀典實有裨焉行見民物共安樂阜邊境永息烽煙所爲上荷 神庥曷有暨耶功成不能無記

爰誌其梗概勒之於石陳禹謨詩漢季英雄孰最
優南陽一出定誰儔三分再振興劉業五丈終抒
抗魏謀星隕當年關國運祠存千古慕忠猷英靈
願借扶明主殲殄南蠻早獻囚

新附

徐公祠 在北門外一里

明徐之禎記龍湖古夔國地極南有涼山羅計賦
夷數種魑結反舌馮熊虎力往往咆哮醜黨出沒
榮賴恣睢抄劫大爲我疆土患萬曆丁亥年復匿
三城建越亡命據塗遮殺侵蝨愈熾有司者蒿目
顧慮率眾勘諭賦夷竟少我眾殲之其狂逞殆叵

敘州府志

卷十一

壇廟

九十五

馬邊

測矣事聞於天子再以夷獯罪授大中丞徐公公
當征吐番建南捷後戰血未乾不忍言兵事奈民
讐國辱何無已秉鉞嘉陽移幕戎州所調發郡衛
卒及羅鬼諸士兵及募勇敢士義合雲集近徵戎
渝給餉便捷易輸推任文武材碩無異兵松建時
閒嘗易事而治而所增益執役皆其博揀而獨器
者耳一時小大將士咸受方畧既月賦乃逆命公
促李將軍營涼山而授算益奇乃元宥如賦乃安
興王大咱諸酋長面縛就執羣頑盡殄并收京觀
脅從回嚮者待以不死它如收還掠虜婦子奪獲

夷器頭畜具詳載三征傳記中不可枚舉我師奏
凱公復云汪茹蘗漂膏邊治最著士人憇蔭飲純
仰邇源本乃肖中丞公貌葆之顧瞻字缺四伏臘惟
謹於都哉義斯舉也汪奇其事冀記以石而具以
示富義令張濤俾與聞焉且若曰令曾勘功觀營
三至其地耳目所周固已盡悉而又屬中丞公宇
下吏將有發於言乎令謝不敏問言於余余惟膩
夷蠖蝮之與鄰而貙豸之與侶卽焦明羞過之五缺
字乃今過鳥道爲康衢易雕題爲冠帶蘼蕪結縷
之間得以春秋集眾鱣而訓之跳呼之徒津津絃

誦國家遂幅幘萬里於正朔所不到之域由此羌
番叩笮冉駹牂柯夜郎諸長君罔不惴茲九伐縱
有天驕之雄亦竄首而不敢動視武陵石鼓淮右
金鎗功伐無後先矣鎮之人肖像而敬事之固其
宜哉夫以勞定國祀典自在斯何當於中丞公惟
漢夷競變進爲俎豆西南夷千載蒙庥矣祠在北
門鎖鑰離城外一里別墅靈山公館以汪基邊廳
初夢漢壽亭關侯命二童子刀劈茲山繇之膚功
若助因以名館當世廟時督察趙公文華焦勞計
畫曷以億萬年威順惟休遂斟酌溧陽武公三原

李公海南周公所籌將邑屏山置流官以承馬郡兼廳四土司布政蠻夷中都西南涼山宅黑而東地曠利廣第盤巖磔磔勢難遙制夷人又慣以嗚嗥夏服爲業屠腥刃鱉之習不易順化度賴因狝安邊廳設以守備司彈壓乃無虞已中丞徐公具疏以請報可於時馬郡佐襄陽汪公京轉餉贊著多奇功最爲中丞公所重中丞公疏以廳事付之汪壹意畢力經營拮据蚤暮雜匠卒間鼓舞丕作已丑冬及庚寅秋匝期而工成堂廳城館巍然煥然若九窳築而纍台增矣汪蒞政三年涼山夷獯

襁負逮籍者燈火萬家翦棘火箐鑿井墾畝竟百餘里許然橐鞬旣葺稍驅之以向學而夷亦速消歲壬辰徵其秀者升之督學汪公試遴十九人列博士弟子員嗣後梟黠頹頹漸爛文教不直埋奴立誓缺四字蠟齊於編戶已也先是天子嘉中丞公三征偉伐累遷拜南京大司寇而汪竟得中丞公所推轂進階四品服俸並酬平定之功帥師平倭軍中見有神助缺五字興而徐海悉擒今上初服撫臺曾公省吾有大事於九月十三亦夢關侯輪刀向都都寨而阿達授首茲之靈顯固皇穹厭禍假

關侯以底綏茲土毋抑中丞公暨諸君子實所式
憑字缺^四 並建今古忠獻報崇遠矣中丞公諱元太

乙丑進士直隸宣城人志通

雷波廳

社稷壇 在城南一里

神祇壇 舊未立壇附先農壇合祭

先農壇 在城南門外道光十二年通判郭輝翰建

厲壇 在北門外一里

文廟 詳學校

名宦祠 在文廟內

敘州府志

卷十一

壇廟

九十八

雷波

鄉賢祠 在文廟內

忠義祠

節孝祠

關帝廟 在城東南雍正九年提督黃廷桂建同治

中通判楊澤溥參將韓廷貴林耀龍先後培修

黃廷桂記維我

皇上撫御寰宇仁漸義摩聲教所訖無遠弗屆凡夫跂行喙

息之倫孰甘自棄於光天化日之下者蠢茲僇蠻

性同狼豕在昔叛服不常頃者戊申之歲米貼土

婦陸氏悖法跳梁而雷波土司楊明義勾通結覺

阿照諸夷肆行盜掠時余職任提督事務奉

命統戎行用張撻伐仗

天威而遵

宸算未浹三旬殲厥渠魁焚巢掃穴一洗氛祲綏靖邊徼復

仰體

皇仁寬其脅從安輯無辜當雷霆震懾之餘沐以雨露涵濡
之澤莫不匍匐懽呼永世無貳一切善後機宜殫
心籌畫敬陳天聽幸蒙

俞允余周覽進勦經由之地見夫雷波一境左挾冕越右跨

六詔前拱建南後衛敘馬羣山扼險金沙劃界誠

敘州府志

卷十一

壇廟

九十九

雷波

腹裏之屏藩要荒之隘區也爰相度形勢築城郭
修營壘設流官規畫旣成邊鄙晏然事半功倍又
如是之速恍有神助伏念

關聖帝君歷朝累加顯號今

上御極以來又復追封三代解州洛陽皆設博士春秋祭享

備極尊崇維此蠻疆無異中夏特虔構廟宇是經
是營大門三間正殿後殿如之配以廊廡繚以周
垣計日落成規模宏敞余肅將瞻拜因憮然曰

關聖浩氣英風卓絕千古廟祀之典不獨通都大邑巍峩
煥赫卽棘道蠻荒咸昭誠敬且月之朔望營衛諸

員於此宣講

聖諭彼旃裘魑結之眾靡不環拱敬聽嚮風慕義蒸蒸然共沐浴於太平德化之盛焉夫捍禦疆圉撫字百姓則官司土者之責而默佑於上俾雨暘時若歲獲豐穰民歌樂土者維神之力也蓋以

聖天子在上則百神効靈我

皇上文德武功光被四表普天率土莫不尊親今輿地日拓邊陲蕩平瞻雲就日之下兵息民安當共慶郅隆於億萬斯年矣余中心懼忤敬獻匾聯用志永久並序顛末壽之於石

敘州府志

卷十一

壇廟

一百

雷波

文昌廟 昔在城東山離城二里同治六年署通判彭兆蘅建今改建廳署右學署舊址

〔彭兆蘅記雷波在蜀之西南隅蕞爾巖疆素號僻陋百餘年間仕宦學業聲明文物無所稱意者山水險惡鍾毓無靈地有以限之而汶汶至是與抑亦人事之培成有未盡善也予下車伊始周視城垣因登南城樓望西南諸山爽氣如挹對岸峯巒秀麗層疊朝拱東插一峯如屏橫障之金江下流縈迴似帶山水停峙交映若此此而曰地不產材夫將誰期後於朔日循舊例謁先師廟並展禮諸

祠見

文昌帝君廟在東山之麓地既荒遠廟宇亦極狹隘因念帝君以孝友之德闡苞符之蘊佑啟人文化成天下凡有血氣莫不尊親而邊地荒涼其崇奉而祠祝之者僅若此宜神之不享地之不靈人材之不出也予以藐躬忝爲民牧凡事之切於吾民爲職分所當盡者罔不次第修舉况興學校禮神明感通幽明肇開文運尤非一時一事之利若因陋就簡固而安之其何以盡予守土者責也爰擇城內正街昔年學署舊址地勢面南宏敞氣脈融結乃集都人

敘州府志

卷十一

壇廟

百一

雷波

士而謀之僉曰此善地也鍾毓靈秀妥侑神靈於斯爲稱遂集數百金建正殿一楹抱廳三間廳之東爲朝房門外照牆一座以六年春經始至秋落成廟貌輝煌丹青炳耀庶幾展誠敬薦馨香通眞宰之靈啟文明之運濟濟多士從此登桂籍躡青雲名宦鄉賢連鑣接軌無非帝君之默相裁成而爲予之所厚望也謹序

奎星閣

龍神祠

火神祠

在城內東偏道光十九年通判劉耀庚建

在城南雍正九年提督黃廷桂建

昭忠祠 原建在城隍廟後咸豐元年通判李清晏
建光緒五年參將邵永齡通判余上富移建於白旗
廟右

呂眞君祠 在北門外垂珠洞右嘉慶二十五年通
判陸成本建

劉公祠 在城東龍神祠內祀故通判劉耀庚道光
十七年逆夷大亂危幾不保公莅任募勇擊賊勦撫
兼施諸夷畏服乞降事平稟請添設營汛並改建石
城民戴其德立祠祀之

盛公祠 在東門內祀參將盛公世祥道光二十年

敘州府志

卷十一

壇廟

百二

雷波

逆夷亂後公到任卽協同通判劉耀庚辦理夷務添
設營汛邊圉肅清其功在民故立祠以祀

關王廟 在黃螂司城內明萬曆十七年建因擒獲
興安夢神授以方畧故建廟祀之至我
皇朝雍正六年提督黃廷桂重修勒石爲記

黃廷桂記

聖天子御極之六年雍正戊申天宇所覆地維所載氈裘卉
服之區鑿齒雕題之域來享來王悉主悉臣顧茲
米貼土婦陸氏以蚍蜉畏罪不能自縛就戮遽敢
要結黨羽跳梁山澤余時提督軍務率諸營將士

奉行

天討旬日之間深入蠻箐行列陣布旗明甲耀未盡厥武所向率服一二醜類莫不俘獲誅殲藁街懸首以宣示

國威俾震懾之餘又憫其頑愚又其脅從蓋殺伐既張與之更始而黃螂土司國寶遂以其地內附余因夷情歸化相度形勢見黃螂一隅實爲黔越咽喉戎瀘藩衛乃阨險隘築哨堡建城池設戍部歷歷善後俱有成畫並以奏

聞又伏思

敘州府志

卷十一

壇廟

百三

雷波

關聖帝君廟祀徧萬國精靈彌六合義勇蓋三分我朝

神聖相繼威武張大湛恩汪濊聲教所訖無遠弗屆是帝君之威靈

朝廷之德化兼容並包齊觀等量爰崇其廟貌昭其祀事禮制之隆侔於東魯每月之朔望營衛得於此宣講

聖諭夷氓拱聽以成一道同風之盛且冀

神之默存感應與

國家懷柔綏服之意胥爲表裏其荷

神之庥曷有極歟廟創始於某月日告竣於某月日屋
成若干楹垣周若干尺輪奐既新堂皇既飭室宇
有嚴廊廡有秩漢夷具瞻罔不祇肅遂額曰

關帝之廟且敘次顛末勒石垂遠他如工力財用之數供

億董事之人則紀於碑之陰云

白旗廟 在城東偏乾隆初年普安營兵征勦夷匪
至黃茅岡煙霧瀰漫迷惑失道三日不能出後見山
中似有人行前一白旗爲引導後隨數人隱約類夷
裝身軀豐偉隨之行倏然不見遂得大路軍士生還
感神靈庇佑因建祠以祀名白旗廟廟內奉三神像

敘州府志

卷十一

壇廟

百四

雷波

年少白皙寬面大耳俗又名爲大耳神疾病祈禱屢

有靈應相傳其神爲黑龍太子云

並廳志